



曲阜縣志卷之八十九

知縣楚安鄉潘相修

列傳第八之二十八

男承焯編

顏康成 孔策 孔溫業 孔敏行 孔振 孔拯

孔纁 孔緯 黃孫懋



顏康成父育德太子通事舍人司經校定書史祖卽思魯也
康成以唐永徽二年進士第一人及第擢官制科太子舍人
崇文學士其所表見不傳明嘉靖中邑人郭本爲三氏書舍
義倉記云巡撫都御史張公分藩日舉三代養民者以爲治
旣均曲阜土田民得其養矣乃謂教養一也二之未可也復
爲教以一之且曰古之教教民以行今之教教士以文因文
以成行因士以及民蓋庶幾矣於是程兩學諸子之文以觀

曲阜縣志卷八十九 列傳

一

行示化裁也旣而考闕里誌得狀元咸通者二人振也纁也
狀元中和者一人拯大中者一人緯皆孔子四十代孫兄弟
也作而嘆曰盛矣哉是可以教矣乃新義倉舊坊榜曰狀元
以厲多士義倉在夫子廟稍東蓋爲三氏子孫作歲久而廢
檄曲阜縣收木瓦可用者發帑銀益之以新爲屋南五楹東
西十楹俾三氏弟子居業其中譬之風鼓橐萬物迹不施而
物化矣何者物隱於璞藏於土不惟人不知物亦不知也條
風東來勾萌甲拆燭然田畝林薄間千態萬狀而不可數景
風至則實纍纍出又端倪莫測也夫風不能無意於物而所
以爲意苟乎忘之矣張公之建坊建學宮也決水於泉引射
於穀未嘗一一使之入使之有爲也不猶風普萬物而無物

耶坊新於辛酉春曾未越月成明年學宮成重門周垣井竈
必備僉守者一人司肩鑰顏其南曰立齋東曰興齋西曰成
齋協教授學錄選弟子孔宏錦承光引墳顏從舜嗣慎等三
十二人居焉日從而振德之三十二人者爭先淬礪發發而
泉湧三十二人後又不知更積數百千人矣於戲希前人之
科第乃諸子餘事耳能委身學道不浮沉於聲利發六經之
腴以風雅天下使天下之人被其澤聞其風指之曰是真大
聖賢子孫也茲固張公所厚望亦諸子所以厚自待也既而
又以顏子三十八世孫永徽狀元顏康成白之公與提學袁
公績登是坊焉夫天下事未有美而弗彰倡而弗和者績於
今則能績於後可必矣張公甲辰進士南充人號石洲平田
矣世有吉人載其嗣矣

孔策唐舉明經及第授本縣尉歷官少府監主簿國子監丞
遷尚書博士襲封文宣公詳世家

孔溫業字遜志戢長子也唐穆宗長慶元年進士第二人及
第遷禮部員外郎開成中宰相鄭覃以經籍劾繆博士淺陋
不能正建言願與鉅學鴻生共力讐刊準漢舊事鏤石太學
示萬世法詔可乃表薦溫業與集賢殿學士周墀水部員外
郎崔球監察御史張次宗等共正焉溫裕之貶柳州也溫業

官吏部侍郎亦求外補宰相白敏中謂同列曰我輩須自檢點孔吏部不肯居朝廷矣後遷太子賓客卒

孔敏行字至之述睿子也唐憲宗元和元年以進士第一人及第岳鄂呂元膺表在節度府元膺徙東都河中輒隨府遷入拜右拾遺四遷司勳郎中集賢殿學士諫議大夫李絳遇害事本監軍楊叔元時無敢言敏行上書極論之叔元乃得罪卒年三十九贈工部侍郎敏行雅操不逮其父然少能修潔及仕宦所交皆當時豪俊名重一時云

孔振字國文唐懿宗咸通四年進士第一人及第襲封文宣公詳世家

孔拯字公濟振弟也唐僖宗中和三年進士第一人及第官

曲阜縣志卷八十九 列傳

三

侍中

孔纁字徽夫孔戮之孫父溫質四門博士纁以唐懿宗咸通十四年進士第一人及第其同懷兄絢以咸通二年登進士第從弟緯以宣宗大中十二年進士第一人及第宋廣卓異記有一門弟兄三狀元之稱

孔緯字化文戮之孫也父遵孺舉明經進士官華陰縣丞緯及第後東川崔慎由表置幕府從崔鉉淮南復從慎由守河中再遷觀察判官宰相楊收薦授長安尉直弘文館遷監察御史進禮部員外郎兼集賢直學士母喪解還爲右司員外郎趙隱言其才拜翰林學士俄知制誥遷戶部侍郎擢御史中丞緯方雅疾惡若讐中外聞風未繩輒肅三遷吏部侍郎

權要私謁至盈几一不省當路不悅改太常卿從僖宗幸蜀以刑部尚書判戶部蕭邁雅不喜坐調度不給改太子少保及帝避朱玫次陳倉惟黃門衛士數百扈乘輿詔拜緯御史大夫令趣百官至行在羣臣露次盤屋爲盜剽脅衣囊畧盡緯謁宰相欲有所論邁與裴澈怨田令孜不欲行辭不見緯召御史曰吾等身被國恩誼不辭難今詔羣臣皆不至夫與人布衣游猶緩急相卹况於君乎且泣下御史亦辭方寇效丐衣食請辦一日費而行緯曰吾妻疾旦暮盡丈夫豈以家事後國事乎公善自謀吾行決矣往見李昌符曰詔書再至而羣臣顧未行僕大夫也不敢後願假兵護送天子所昌符具資裝送之緯及行在策攻必反建言關邑阨狹不足駐六

師請帝幸梁州卽日去陳倉而攻兵至微緯言幾不脫進拜兵部侍郎同中書門下平章事攻平從帝還領諸道鹽鐵轉運使累遷尚書左僕射賜號持危啓運保乂功臣鐵券恕十死又賜天興良田善和里第各一區兼京畿營田使昭宗卽位進司空以太學焚殘乃兼國子祭酒完治之加司徒封魯國公帝將郊見中尉樞密使索宰相朝服有司白中人無衣冠助祭事中尉怒責禮官必得緯言中人不朝服國典也陛下欲假借之則請以所兼官爲之服諫官固執帝召謂曰方舉大禮爲我容之進兼太保時天武都頭李順節疏暴人也以浙西節度使兼平章事臺史白已謝當班見百官緯判正之明日順節盛服至則無班怏怏去他日見緯以爲言緯曰

固疑公見望也夫百辟卿士天子廷臣班見宰相以宰相爲之長公提天武健兒據堂受禮安乎必欲用之去都頭乃可順節慙縮不敢言張濬將伐太原帝不決以問緯緯助濬請旣濬敗坐傳會出爲荆南節度使俄貶均州刺史二人皆密結朱全忠全忠爲請詔聽所便乃屏居華陰李茂貞入殺韋昭度帝惡大臣朋比與藩臣交更思用骨鯁正士遣中使趨華州召緯入朝以疾未任上路六月授太子賓客其夕改吏部尙書翼日拜司空兼門下侍郎同平章事太清宮使修奉太廟弘文館大學士延資庫使階爵功臣名位食邑並如故旬日之內驛騎敦促相望於路緯扶疾至京師見帝嗚咽流涕自陳衰疾不任事乞歸田里帝動容令閤門使送緯至中

書視事不旬日沙陀次河中同州王行約入京師謀亂帝出幸石門緯從駕至莎城疾篤還京家人召醫視緯曰天下方亂何久求生不肯服藥九月卒贈太尉子昌弼舊唐書作崇弼亦登進士第仕至散騎常侍

黃孫懋字

乾隆元年進士第二人及第官至內閣學士

論曰自選舉重鼎甲尤重第一人而邑當唐世孔氏得五人策與振拯皆大宗子顏氏亦得一人焉以第二人三人及第者又數人可不謂盛歟余嘗考王曾自省試及廷試皆第一或語以喫着不盡曾正色曰曾平生之志不在温飽而蚤歲賦梅花已有安排一生狀元宰相之譽曾後果不負科名敏行正色立朝有古諍臣風緯際旻天之疾威崎嶇殉國忠誠

剛果大節凜然古先哲后嘗焚香求得一忠孝狀元斯固克
稱其甲第不虛人主禱求者哉
曲阜縣志卷之八十九終

曲阜縣志卷八十九

列傳

六

曲阜縣志卷之九十

知縣楚安鄉潘相修

列傳第八之二十九

男承熾編

張進 王澄

張進拳勇善射挽彊及石餘應募曹州隸鎮兵宋太祖親選
勇士奇進才力以補控鶴官積勞至御龍弩直都虞侯領恩
州刺史至道中兼御前忠佐步軍都軍頭太宗嘗幸內廐進
以親校執鉞前導體質魁岸迥出儕輩太宗熟視異之擢爲
天武右廂都指揮使領賀州團練使咸平初遷昭州防禦使
充龍神衛四廂都指揮使京城左右廂巡檢未幾遷捧日天
武四廂都指揮使二年秋閱武近郊進與殿前都指揮使王
超執金鼓節其進退軍容甚肅從帝北征又與超管勾大陣

曲阜縣志卷之九十

列傳

一

及先鋒策應三年權殿前都虞侯遷侍衛步軍都虞侯鎮州
副部署徙天雄軍部署會河決鄆州王陵口發數州丁男塞
之命進董其役凡月餘畢詔褒之移并代副都部署李繼遷
寇麟州州將遣單介問道乞師太原諸將以無詔旨猶豫未
決進獨抗議發兵赴援旣至而圍解手詔褒美契丹侵中山
命進率銳二萬騎由土門會兵鎮定未至而敵退復歸晉陽
景德元年卒帝遣中使護喪還京官給葬事子元晉官至內
殿崇班閣門祇候天禧末錄其次子元素爲三班借職

王澄字漪清長身廣額巨聲濶步屹然如山立雍正甲辰武
進士點侍衛同官某婦卒貧不能具棺澄以卒歲質衣得十
六金盡與之某泣曰某老病卽填溝壑無以償澄曰留不償

償也後某忽乘高車來曰蒙

皇上知某窮

恩授領侍衛內大臣賞千金敢分其半澄固辭某揮涕留原金去居無何出爲浦口營都司遷松江城守營遊擊署川沙營叅將故事春秋乘巨艦巡海道然往往止泊島嶼澄獨乘潮出口過羊山馬跡清理蛋戶魚舟歸遭颶風連下三碇纜俱絕漂至甬門兩山壁立中水底多礁觸則壞澄不畏也豐沛災澄日馳三百里往來稽察制軍初訝其速以爲妄飭有司馳報所經過時日悉符始歎其勤敏遷太湖營叅將值徐達滿洲二姑娘等屯聚七十二峯間前官望吏議澄至嚴巡邏重賞格盜皆散去陞京口副將調太湖營副將授蘇松鎮總

兵

曲阜縣志卷九十 列傳

二

命澄以江浙漕米十五萬石由海道賑閩中饑澄自上海乍浦抵漳泉廈門歷蛟門濤山石塘青嶼烽火諸險颶沉米二千石例應解弁賠補澄疏請以己祿扣抵丁父艱歸服闋入都召見勤政殿賜花翎以澄母老仍補蘇松鎮總兵旋丁母憂歸上東巡出迎

駕奉

旨署正定鎮總兵復調開化鎮辭以喪服未滿不許開化界安南漫匡猛配沙匪黎忠直等屯聚不靖澄嚴兵守捍無闖入交沙亂帶兵防範所過瘴厲特甚二月初旬氣蒸蒸如盛暑樹頭多生蛭聞人聲則蜿蜒下人馬遭之潰爛土人曰此地

六十餘年無外人到叩馬諫不聽曰我爲若等來今敵屯對岸知不前乘間突入若等皆爲虜矣令軍中不得飽食各放鳥銃使藥氣衝散可無患比至則沙匪遁去往反十日無病者調昭通鎮總兵乾隆二十七年

特擢甘肅提督轄四鎮地大人庶番夷交錯易生變澄以鎮靜處之千里晏然越三年

陛見引年乞休不許又二年卒於官

曲阜縣志卷之九十終

曲阜縣志卷九十

列傳

三

曲阜縣志卷之九十一

知縣楚安鄉潘相修

列傳第八之三十

男承熾編

廿二史循吏不多傳雖由闕佚亦以副其稱者實難也幸曲阜者若漢之鮑疊北魏之杜僧壽宋敬遵隋之陳叔毅唐之張之宏田思昭周待選皆於斷碑中識其姓氏其事蹟皆不詳其間有可述者已與為魯相之田叔鍾離意乙瑛韓勅史晨為郡之云敞鮑永張應張猛龍輩皆見於通編自唐咸通中以孔續為本縣令歷五代宋金元明及今八百餘年以公兼者見世家功名顯著而不終於尹若孔道輔諸公已有傳終於尹而其賢不以治民見者又別有傳惟終於尹而利澤在維桑者以余所見聞得十七人焉乾隆二十一年始易流

曲阜縣志卷九十一 列傳

一

官及余而四矣惟嚴文典差有聲以見存不立傳其已闕棺如張若本亦不沒其實焉陳頴語子曰選法例離籍五百里防請謁也曲阜世尹固難為然世尹不乏稱職者而流官亦鮮卓卓可稱述蓋不以私害公亦存乎其人耳余聞之為汗浹背者累日附記之以告後人

孔克欽 孔克中 孔希範 孔譔 孔燮 孔公鏞

孔克珪 孔宏復 孔貞叢 孔聞簡 孔貞堪 孔

尙愉 孔衍淳 孔興認 孔衍澤 孔毓琚 孔傳

松 張若本

孔克欽字敬夫思誠子篤志好學該博經史襲父職尹曲阜鋤強梗卹老弱境內肅然稱治會歲饑賑恤有方所全活者

甚多荆建洙泗書院設山長教育生徒建倉貯粟贍貧族卒之日民爲巷哭祀於鄉

孔克中字正夫宗翰十代孫明永樂中薦知曲阜縣力辭不受強之乃應辟下車之後請帑修尼山祖廟先聖瑩域及學校壇壝政通人和百廢具舉卒祀於鄉

孔希範字士則衍聖公克堅第三子少時卽以賢稱宗族欲薦知縣事希範讓於從父克雷克雷卒又讓於從兄希文希文又卒族人終薦之不得已乃應薦既受職行直道不避宗戚有豪族誣民以戍邊罪其人勢焰灼甚希範曰吾爲令視民枉而不理非職也請於上官民寃得白以其罪罪所告者於是豪強皆帖然歛迹

曲阜縣志卷九十一 列傳

二

孔諛字蘊伯克仲孫初隱沂水上自食其力以養親不求聞達而明辨果決每廟庭有疑事族長就決焉正統間薦授曲阜知縣有能稱歲旱蝗清滯獄寬急逋中夜齋沐請禱遂得大雨飛蝗盡殪民有私繼室訟前妻子者諛廉得其情詔以天性父子感泣於庭卒成慈孝焉

孔燮字理伯克中孫有至性母病篤籲天請代嘗糞以驗甘苦母尋愈爲曲阜知縣聽斷明決人不敢欺歲荒先賑而後聞生全者無筭後加兗州府通判卒祀名宦祠

孔公鏜字聲文衍聖公訥第四子慷慨有氣節敦尙信義人有過輒面質其非時目爲孔門御史宣德中薦知曲阜縣十年邑中大治乃上疏乞以族之賢者代不許會有無賴子誣

陷以事公鏗不辨曰得掛冠是吾願也遂奪職景泰初衍聖公入覲陪祀太學始爲陳其誣枉有詔復官

孔公珏字栗文燹次子嘉靖中授曲阜知縣廉而能寬以仁愛爲治有王禮者受誣坐重辟公珏廉知其寃爲力辨乃得理嘗語父老曰生聖賢之鄉而風俗日偷心甚憫焉乃條愛親敬長睦鄰卹族十數事率子弟輩以身先之民亦感化居官十二年家無餘財致仕後民見其無以蔽風雨也爲運土築宅至今經其地者猶稱曰萬民牆云卒之日里爲罷市祀鄉賢祠

孔宏復字以誠公恂曾孫萬歷元年山東撫按請仍以世職管縣事乃考選宏復爲曲阜知縣宏復旣蒞任患積貯不備無以救水旱乃建二十四倉以廣儲蓄民賴以濟在任二十三年加都轉鹽運同知銜致仕

孔貞叢字用茂萬歷二十七年授曲阜知縣興利除弊民安農桑三十年奉委開泇河工役借庫銀四百金無以償貞叢曰是役也民億已甚吾不能代民勞復忍腹民膏乎乃焚券自積俸補之以四氏學去廟遠特改建新學宮并請增廩額如府學考滿加東昌府通判後加都轉鹽運使致仕

孔聞簡字知敬天啓元年授曲阜知縣剛明果斷有折獄才二年流寇竊發聞簡緝獲賊謀斬以徇賊再攻城皆設法禦卻之擒巨寇劉燦等十餘人寇遁斂功加東昌府通判後以事去官卒

孔貞堪字用輿以廩生薦授曲阜知縣性倜儻志量不羣崇禎十四年齊魯大饑寇盜並起貞堪多方拯救親冒矢石獨宿城頭者六月邑賴無虞以丁憂致仕

孔尙愉字怡之聞詩孫爲曲阜知縣睦族愛民除去一切苛政會有挑河之工民不堪命故事惟孔顏子孫得免役民戶不與尙愉爲請於上亦獲免民賴以安卒祀鄉賢祠

孔衍淳字遠舉順治元年任曲阜世職知縣時土寇竊發請省會兵躬爲嚮導賊授首叠遇饑荒捐資者粥撫災民全活甚衆

孔興認字緘三再任世職知縣不私宗族不畏強禦公平正直戚里無間言

曲阜縣志卷九十一 列傳

四

孔衍澤字沛也性仁厚屢逢蠲免賞賚殊恩皆真心措畫俾需實惠家素饒爲世尹十三年反耗落解任後人猶念之

孔毓琚字季玉興認第四子以抑強扶弱爲己任吏胥惴惴守法凡聽訟戒懲似嚴父體恤如慈母無不得當以去疑案

十數悉昭雪無縱枉尤好結納名士若王澍蔣衡何琦皆延致署中日論文講吏治治以有聲修縣志未成士論惜之

孔傳松字鶴林由拔貢生考取八旗教習舉京闈學務體用兼備以孝友聞補世職壹意拊循丁卯夏無麥禾饑甚會明年

天子幸魯議者欲弗聞傳松曰

皇上清問下民何粉飾爲亟以請得賑如例復倡捐設粥廠倣

古法而變之又以工代賑多全活者時官吏初逢盛典多惰如傳松處之曲當民無怨言築典龍防千三百餘丈墮泗水詳免民夫赴濟寧挑運河設義學新狀元解元坊建魁星樓嚴禁刁健士習益向上有請業者灌灌如塾師解任後變產補官項以教讀給饗殮子繼睿由昌邑諭陞上虞令邑故多上控案傳松謂曰民之上控皆由官急控案輕自理理或草草不厭人心令旦日先自理務允當而控案次之不期月人稱繼睿賢且知爲傳松力其沒也思之如曲人皆歎爲未竟其用云

張若本桐城人由舉人授新城知縣會巡撫白鍾山請改曲阜縣爲兼三要缺在外調補

曲阜縣卷九十一

列傳

五

天子允之以若本調補至則刻意變舊架務爲柱後惠文壹切過甚喜鉤距測事情因時操縱吏民震栗三考俸滿陞漢陽

郡丞去

曲阜縣志卷之九十一終

曲阜縣志卷之九十二

知縣楚安鄉潘相修

列傳第八之三十一

男承焯編

師道立則善人多而師儒之傳者蓋寡四氏學若宋之尹復
臻薦於文彥博元之楊庸由帝簡陳儼乃內召必皆有足稱
者惜無徵茲就其有徵者次之用見先王建學立師之意而
縣學則博求之不可得嗚呼其真無聞人耶抑紀載之缺耶

張頌 孔思逮 張敏 裴侃 孔克晏 江湜

孔克晏 孔公璜 湯中允

張頌字達善其先蜀之導江人蜀亾僑寓江左從金華王柏
遊得聞朱子之學自六經語孟傳注及周程張氏之書經朱
子論定者靡不潛心玩索究極根柢用功既專且久學益宏

曲阜縣志卷九十二 列傳

一

深微密南北學士鮮或及之元至元中行臺中丞吳曼慶聞
其名延致江寧學官維揚及中州士大夫慕朱子書者皆遣
子弟從遊或闡私塾迎之翕然尊爲碩師不字呼稱曰導江
先生大臣薦諸朝特命爲孔顏孟三氏學教授頌氣宇端重
音吐洪亮講說尤精詳鄒魯士之從之者誦誦如也其高第
弟子夾谷之奇楊剛中尤顯頌無子有經說及文集行世吳
澄序其書以爲議論正援据博貫穿縱橫儼然新安氏之尸
祝也至正中眞州守臣以頌及郝經吳澄皆嘗留儀眞作三
賢祠祀之

孔思逮字惟道元元貞元年爲三氏學正聞張頌教學之方
以弟子職存古者小學意本子夏洒掃應對之教伯魚詩禮

之學達乎子思廣大高明之極致自八歲以上皆教之學學以大興至大中爲曹州教授左三部照磨以宣聖廟禮樂廢缺言於禮部曰闕里四方之所瞻仰也今釋奠行禮無大成雅樂不稱如蒙製造發下本廟以修祭祀庶盡事神之禮傳之萬世上以新聖朝崇尚之規下以慰四方瞻仰之意中書省用其言移江浙行省製造運赴闕里後爲曲阜尹歷大樂署署丞署令陞太常禮儀院判著大元樂書

張敏廣平人明永樂中爲三氏學教授其教規不傳有尼山新廟碑文孔氏報本酬恩記固知文學者

裴侃清江人宣德中爲三氏學教授奏請闕里文廟加封伯魚曾點公爵偕顏子孟子父俱配享啓聖王祠正名分安神

曲阜縣志卷九十二 列傳

二

靈報可後嘉靖中釐正祀典蓋自侃發之時工部侍郎周忱來謁廟率蘇州知府况鍾通判邵謙捐建金絲堂命侃記之文亦可觀見金石志中

孔克旻字堯夫少與兄克晷弟克旻並有文譽長遊江淮汝泗遍歷名山大川爲文益雄宕有奇氣性端謹不苟取與途遇遺橐不顧而去遇婦人必面牆以俟其過宣德元年補三氏學學錄課督有方弟子多著聞若孫昱孔公恂公錫皆成名進士後爲族長教家有法度不若訓者召至誨諭之皆愧悔泣下其善化人如此

江湜歙縣人正德中補三氏學教授勤於訓誨衍聖公命其長子承慶從學學尚書及詩禮皆窺尋向上多湜力惜其詳

不得聞云

孔克旻字舜夫性恬澹不樂仕進亦不喜舉子業惟樂與兩兄會賓客賦詩飲酒自題其室曰樂庵天順八年舉爲三氏學錄固辭不得乃就職來學者隨其高下教之無不得所成就以去

孔公璜字黼文成化中薦授三氏學錄釐正學田建顏母祠朔祀孔氏中興祖仁玉之外祖張溫請立子思子奉祀博士改尼山洙泗書院山長爲學錄凡所興舉皆知務刻苦勵行舉止端重途遇雨濕衣冠從者請速行公璜曰卽速庸得免乎嘗夜遇盜相戒毋驚駭護送至家叩首去喜爲歌詩有北窻文稿行世

曲阜縣志卷九十一 列傳

三

湯中允字臯問滋陽廩貢生性峭直勇於爲義遇歲饑捐米百五十石以助賑又爲粥於路以待餓者而食之戒無嗟來衍聖公嘉之保任四氏學教授捐資修學屋以禮待諸生口授指畫甚諄復歷六年列上考以疾卒

曲阜縣志卷之九十二終

曲阜縣志卷之九十三

知縣楚安鄉潘相修

列傳第八之三十二

男承炳編

星象醫卜前史並收方伎藝術治理存焉傳其所聞用見巧智之寓機應于心不挫于氣無細大無敢不專精也惟是敬佩格言仰遵遺矩仙神怪誕屏去不存遊聖門者尙共辨之

匠師慶 卜楚邱父 梓慎 東野畢 巫官變 師

摯師乙賓牟 師襄颶巴 魯石公 公輸子 梓慶 公

孫臣

匠師慶摯匠大夫名慶卽御孫也莊之二十四年丹桓公之楹而刻其桷慶言於公曰臣聞聖王公之先封者遺後之人法使無陷於惡其爲後世昭前之令聞也使長監於世故能

豐縣志卷九十三 列傳

一

攝固不解以久今先君儉而君侈之令德替矣公曰吾屬欲美之對曰無益於君而替前之令德臣故曰庶可以已乎秋哀姜至公使大夫宗婦覲用幣非禮也御孫曰男贄大者玉帛小者禽鳥以章物也女贄不過榛栗棗脩以告虔也今男女同贄是無別也男女之別國之大節也而由夫人亂之無乃不可乎弗聽

卜楚邱之父成季之將生也桓公使卜之曰男也其名曰友在公之右間于兩社爲公室輔季氏亡則魯不昌又筮之遇大有之乾曰同復于父敬如君所及生有文在其手曰友遂以命之宋大觀三年封昌衍伯

梓慎魯大夫襄公二十八年春無冰梓慎曰今茲宋鄭其饑

乎歲在星紀而淫於亥枵以有時蓄陰不堪陽蛇乘龍龍宋鄭之星也宋鄭必饑昭公十五年禘于武宮梓慎曰禘之日其有咎乎吾見赤黑之祲喪氛也其在泄事乎既而叔弓卒于泄事十七年冬有星孛于太人慎曰往年吾見之是其徵也火出而見今火出而章必火入而伏其居火也久矣諸侯其有火災乎若火作其宋衛陳鄭乎宋大辰之虛也陳太皞之虛也鄭祝融之虛也皆火房也衛顛頊之虛也其星爲大水水火之牡也其以丙子若壬午作乎水火所以合也若火過而伏必以壬午不過其見之月明年夏五月丙子風梓慎曰是謂融風火之始也七日其火作乎戊寅風甚壬午大甚宋衛陳鄭皆火梓慎登太庭氏之庫曰宋衛陳鄭也數日皆

來告火二十年日南至梓慎望氛曰今茲宋有亂國幾亡三年而後弭蔡有大喪已而果然二十一年秋日食公問于梓慎曰是何物也禍福何爲對曰一至二分日食不爲災日月之行也分同道也至相過也其他則爲災陽不克也故常爲水

東野畢以御見定公進退中繩左右旋中規定公以爲造父弗過也

巫官變哀公射而中稷其口疾不肉食祠稷而善卜之巫官巫官變曰稷負五種託株而從天下未至於地而株絕獵谷之老人張祗以受之何不告祀之公從之而疾去

師摯魯太師見論語師乙魯樂師賔牟賈亦知樂者俱詳樂

記及漢之興魯人有制氏以雅樂聲律世世在太樂官已見
橋庇列傳

師襄魯樂師擊磬者也孔子學琴於師襄十日不進師襄子
曰可以益矣孔子曰丘已習其曲矣未得其教也有間曰已
習其數可以益矣孔子曰丘未得志也有間曰已習其志可
以益矣孔子曰丘未得其爲人也有間曰有所穆然深思焉
有所怡然高望而遠志焉曰丘得其爲人黯然而黑幾然而
長眼如望羊如王四國非文王其孰能爲此也師襄子避席
再拜曰師蓋云文王操也其后襄入於海襄之徒有瓠巴者
學琴於襄鼓瑟而潛魚出聽蓋亦得其精云

魯石公以劍名於諸侯其爲劍也迫則能應感則能動物穆
無窮變無形象復柔委從如影與響如麗之守戶如輪之逐
馬而響之應聲影之像形也

公輸子名般魯之巧人也楚攻宋般爲設機械以攻之而盡
其變又嘗怨吳乃爲木人以手指吳吳中大旱三年吳人卜
曰此般所爲也請般謝之般斷其手而吳大雨

梓慶削木爲鐻鐻成見者驚猶鬼神魯侯見而問焉曰子何
述以爲對曰臣工人何述之有雖然有一焉臣將爲鐻未嘗
敢以耗氣也必齊以靜心齊三日而不敢懷慶賞爵祿齊五
日不敢懷非譽巧拙齊七日輒然忘吾身有四肢形體也當
是時也無公朝其巧專而外骨消然後入山林觀天性形軀
至矣然後成見鐻然後知手焉不然則已則以天合天器之

所以疑神者其是與

公孫臣孝文帝時以終始五德上書言漢得土德宜更元改
正朔易服色制度當有瑞瑞黃龍見下丞相張蒼倉以爲非
是罷之及十五年黃龍見成紀天子乃復召臣以爲博士申
明土德事而夏侯始昌亦明于陰陽先言柏梁臺災日至期
果災

曲阜縣志卷之九十三終

曲阜縣志卷九十三

列傳

四

曲阜縣志卷之九十四

知縣楚安鄉潘相修

列傳第八之三十三

男承焯編

易之家人其彖曰利女貞而二之吉曰中饋四之吉曰富家五之吉曰王假有家故化行俗美家室和平願為賢淑不願為節烈以節烈固門內不幸事也近世史志列女皆止載節烈而賢淑不概見母亦以節烈易知而賢淑難稽耶曲邑壺範自顏母元官外亦多無徵就所傳述別為一編蓋亦欲竊附於家人之義云孔顏氏戴孔氏本節婦而不專以守節傳故亦列此他可類推矣

孝義保 紀叔姬 臧文仲母 柳下惠妻 季敬姜

公乘嬀 黔婁妻 母師 義姑姊 漆室女 仲鄭

曲阜縣志卷九十四 列傳

一

氏 鄭曹氏 孔朱氏 孔氏 朱氏 孔顏氏 戴孔氏 顏

孔氏 趙王氏

周孝義保孝公稱之保母臧氏之寡也初孝公父武公與其二子括戲朝周王愛戲以為太子及武公卒戲立是為懿公時孝公最少號公子稱義保與其子俱養於宮懿公九年括之子伯御與魯人作亂弑公而自立復入宮求公子稱義保知之乃衣其子以稱之衣臥於稱所伯御殺之義保遂以稱逃其後王伐魯殺伯御而立稱是為孝公

紀叔姬者魯隱之七年歸于紀為伯姬姊莊之三年紀季以鄒八于齊十有二年叔姬歸于鄒二十九年卒春秋書曰紀叔姬卒又曰葬紀叔姬蓋紀侯既卒不歸宗國而歸于鄒秉

節守義不以亡故睽婦道先儒所謂賢而得書也

臧文仲母文仲將爲魯使齊其母送之曰汝刻而無恩好盡人力窮人以威難乎其免也及之齊齊人拘之而欲以兵襲魯文仲微使人遺魯公書而謬其辭曰歛小器投諸台食獵犬組羊裘琴之合甚思之臧我羊羊有母食我以同魚冠纓不足帶有餘公及大夫莫能知之乃召其母問焉母泣下曰吾子拘有木治矣公曰何以知之對曰歛小器投諸台者言取郭外民內之城中也食獵犬組羊裘者言趣饗戰鬪之士而繕甲兵也琴之合甚思之者言思妻也臧我羊羊有母者告妻善養母也食我以同魚同魚者其文錯錯者所以治鋸鋸者所以治木也是有木治係於獄矣冠纓不足帶有餘者髮不及櫛饑不得食也於是魯侯以臧孫母之言軍於境上齊乃還文仲而不伐魯

曲阜縣志卷九十四 列傳

二

柳下惠妻惠卒門人將誄之妻曰將誄夫子之德耶則二三子不如妾之知之也乃誄之曰夫子之不伐兮夫子之不竭兮夫子之信誠而與人無害兮屈柔從容不强察兮蒙耻救民德彌大兮雖遇三黜終不蔽兮豈弟君子永能屬兮嗟呼惜哉乃下世兮庶幾遐年今遂逝兮嗚呼哀哉魂神泄兮夫子之謚宜爲惠兮門人從之

季敬姜魯大夫公父穆伯之妻文伯之母也文伯退朝朝其母其母方績文伯曰以歎之家而主猶績懼于季孫之怒也其以歎爲不能事主乎其母歎曰魯其亡乎使僮子備官而

未之聞邪夫民勞則思思則善心生逸則淫淫則忘善忘善則惡心生沃土之民不材淫也瘠土之民莫不向義勞也男女效績愆則有辟古之制也君子勞心小人勞力先王之訓也爾今日胡不自安以是承先君之官吾懼穆伯之絕嗣也文伯卒其母戒其妾曰吾聞之好內女死之好外士死之今吾子天死吾惡其以好內聞也二三婦之辱共先祀者請無瘠色無洵泣無捐膺無憂容有降服無加服從禮而靜是昭吾子也孔子聞之曰季氏之婦可謂知禮矣

公乘妣子皮之姊其族人死妣哭之甚悲子皮止之曰安之吾今嫁子矣及過時子皮不復言也魯君欲以子皮爲相曰勿爲也夫臨喪而言嫁一何不習禮也後過時而不言一何不達人事也子內不習禮外不達人事非有天咎必有人禍子其勿爲也子皮不聽卒受爲相居未期年果誅死

黔婁妻黔婁先生窮居閭巷卒之日身藉藁緼袍無表覆以布被手足不盡歛曾西往弔見之謂其妻曰邪引其被則歛矣其妻曰邪而有餘不如正而不足先生生而不邪死而邪之非其意也曾西不能應遂哭之曰嗟乎先生之終也何以爲謚其妻請謚之曰康曾西曰何樂於此而謚曰康乎其妻曰昔魯君嘗欲授先生政以爲國相辭而不爲是有餘貴也賜之粟三十鍾辭而不受是有餘富也不戚戚於貧賤不忻忻於富貴謚之曰康不亦宜乎曾西曰唯斯人也而有斯婦母師魯九子之寡母也臘月休作召諸子問曰吾父母家幼

稚歲時禮不理吾從汝謁往監之諸子皆頓首許諾又召諸婦曰婦人有三從之義而無專制之行今諸子許我歸視私家願與少子俱以備婦人出入之制諸婦其慎房戶吾夕而返於是使少子僕天陰還失早至閭外而止魯大夫從臺上見怪之召而問焉母對曰妾不幸早失夫獨與九子居臘月禮畢事間從諸子謁歸與諸婦孺子期久而返妾恐其酺醪醉飽人情所有也妾返太早故止閭外期盡而入大夫美之言於穆公賜號曰母師使夫人諸姬皆師之

魯義姑姊齊師伐魯及郊望見一婦人抱一兒携一兒而行軍且及棄其所抱抱其所携走於山見隨之而啼遂行不顧齊將追及問之對曰所抱者兄之子也所棄者妾之子也見

曹縣志卷九十四 列傳

四

軍之至不能俱存故棄妾之子齊將曰子之於母其親愛也痛甚於心今釋之而反抱兄之子何也婦人曰已之子私愛也兄之子公義也夫背公而向私愛亡兄子而存妾子幸而得生則魯君不吾畜大夫不吾養庶民國人不吾與也故忍棄吾子而不能無義以視魯國於是齊將按兵而止使人言於齊君曰魯未可伐也乃至於境山澤之婦人耳猶知持節行義不以私害公而況於朝臣士大夫乎請還魯君聞之賜束帛百端而號之曰魯義姑姊

漆室女一作次女魯漆室邑之女也過時未適人倚柱而嘯其鄰人婦從之遊謂曰嘯之悲也欲嫁吾爲子求偶漆室女曰嗟乎吾以子爲有知今無識也夫吾豈爲不嫁而悲哉吾

憂魯君老太子幼隣婦笑曰此卿大夫之憂也婦人何與焉
漆室女曰不然非子所知也昔者晉客舍吾家繫馬園中馬
伏踐吾葵使我終歲不食葵鄰人女奔從人亡其家使吾兄
行追之霖水出溺而死令吾終身無兄吾聞河澗九里漸茹
三百步今魯君老悖太子少愚愚偽日起國且有患君臣父
子皆被其辱婦人獨安所避乎鄰婦謝曰子之慮非妾所及
三年魯果亂齊楚攻之男子戰鬪婦人轉輸不得休息君子
曰遠矣漆室女之思也

東漢鄭氏仲靈臺妻時譽之母也桓帝時時譽以孝行徵問
於其母母曰今日而仕非吾所知也時譽乃辭不就

晉鄭袤妻魯人曹氏袤先娶於孫後聘曹爲繼室事親甚孝

曲阜縣志卷九十四 列傳

五

躬紡織以充奉養及袤爲司空其子默等又顯朝列曹氏深
懼盛滿每默等升進輒憂形于色所獲祿秩必頒散親姻後
袤薨孫氏先瘞黎陽議者以久喪難舉欲不合葬曹氏曰孫
氏元妃理當從葬不可使孤魂無所依也乃備吉凶導從之
儀以迎之旣至爲衣衾几筵親執雁行之禮於是聞者莫不
歎息太康元年卒年八十三

孔尚禎妻朱氏明鉅野王之宗女有孝行王舅年九十病危
朱割股療之病尋愈

顏朱氏伯璟妻亂紹冢婦也伯璟之被難坐帥帳中遇復有
被掠者對伯璟偶語曰昨城中婦女十數輩邏卒驅以走中
一婦不肯行卒反刃擊其臂臂折猶罵不已卒殺之墻下有

媪過之指曰此顏氏婦也伯璵意爲朱語其帥同被掠者至墻下果然蓋刃傷已四日矣驗其息猶未絕載之還後生子光猷光敏光敦俱著聞多氏教育力其孫婦孔氏行人司行人肇雍繼室前配子女已半授家室幼者分襁迭祿顧復甚篤肇雍卒後內外五喪皆盡禮教子懋僑懋企以文學鳴其孫舉于鄉者四人曾孫十餘人元孫二人五世同居無間言尤卹睦族黨凶歲多賴以舉火無德色嫻戚師之卒年八十有四其婦朱氏懋企妻滁牧爾融女性端默精女工衣布茹素如貧女相懋企事舅姑一門稱賢企曾患瘡醫却走朱私持刀夜禱于神出左臂齧二寸肉和麥飯以進企竟愈而朱終秘之至死不自明

曲阜縣志卷九十四 列傳

孔興焯妻顏氏光敏女夫死絕粒五日誓不欲生所親以大義諭之乃強食孝事堂上數十年如一日既侍夫及舅姑疾久博涉方書常製丸散以濟鄉里之癘獨者工文翰著有恤緯齋詩晚香堂詞

歷城戴文誼妻孔氏毓挺女傳鉅妹名麗貞適戴一載夫亡守節四十餘年麗貞能詩與興焯妻顏氏相倡和著藉蘭閣詩草發乎情止乎義君子稱之

顏紹助妻孔氏歷城教諭毓榮女姑患癱瘓起居須人紹助卒氏將以身殉姑謂曰若獨不念我耶乃不死居平感傷嘔血不令點知愉色婉容惟恐傷姑志也卒年八十餘歲

趙王氏董家莊人夫啞而駮食飲不知口處衣服便液皆須

人父母以其無人理欲不爲婚以一子娶王氏氏既至事舅姑得其歡心旦晚爲啞子衣衣解衣無怨言亦無惰容啞子故不知食然得綠豆輒若喜者氏知其好之也恒豫備焉舅姑卒氏縫紉自給三五日輒市綠豆食啞子終其身不衰市兒或焚啞子面若目氏正色呵之然於鄰里未嘗忤姑將歿念祖父母未合葬閱數年氏合葬之成姑志年五十餘病亟託啞子於義女女不欲氏卒啞子隨瘠瘦以沒氏無子墓在某社某村潘承焯曰謝道韞適王凝之告其叔安曰不意天壤之間乃有王郎余考凝之爲會稽太守非癡騃脫令遇氏夫其怨誹當何若也氏事啞子如不及將死猶以託人孝舅姑睦鄉族氏誠難能矣義慶世說固當弁之賢媛哉

列傳第八之三十四

男承焯編

昏禮納幣卜日而有故則致命女氏曰不得嗣爲兄弟女未廟見而死猶示未成婦不幸有吉日而夫亡女斬衰往弔既葬除之固未嘗責以守義終身也顧女之未婦猶士之未仕市井草莽苟能不臣異姓固先王之所重也若議昏納采問名請期儷皮束帛已云貺室子某命爲夫婦而近世結髮多訂於童幼歲時往來問遺雖無深恩難沒大義自士德二三有能爲岸異嶄絕之行者范蔚宗作獨行傳褒之以振激頹波女也士行何獨不然採風者用補列女傳之缺且可爲不傳質之庶人惓惓大義者勵焉

曲阜縣志卷九十五 列傳

一

顏文姜 祝氏二女 顏氏女 孔氏女 孔貞媛

李氏女 朱氏女 周氏女

顏文姜顏子裔之女許字青州李氏未婚而夫亡姜憫舅姑失養往事焉姑素嗜泉時時遠汲以進誠感神明一日泉湧於室姜潛以績籠覆之其家人伺其出而發之泉忽奔湧成河時人因名籠泉河今爲顏神鎮地

祝氏貞孝二女祝榮女也生明正德間長曰志堅次曰志白以父母無子終身不嫁父母歿長者年五十六次五十三結廬於墓後人因其所居爲祠祀之在學宮西南五十步

顏氏弘素女許字孔聞訓年十八未婚而聞訓卒女欲白衣裳往弔父母不許欲死又不許女乃陽爲言笑如平時居數

旬竟自經死

孔氏貞乾女許字奉國將軍朱觀燦未婚而觀燦卒守貞者終身

孔氏名孝媛貞璞女許字顏光朝光朝見孝友傳光朝死孝媛年十七隨父伊陽任所聞訃悲慟絕粒三日自經死時明崇禎九年十一月十八日歸其櫬與光朝合葬

李氏刑部侍郎濤女許字五經博士孔毓埏之子傳鉅婚已有期而傳鉅卒於塗李聞訃毀容成服懷利刃誓靡他舅姑往勸慰之終不能奪遂隨舅姑歸代夫侍養守貞二十餘年卒

朱氏鄉人舉普女許字候選州同知孔毓哲子傳型未婚而

曲阜縣志卷九十五 列傳

二

父母歿無所依孔迎之待醮時傳型就傳鳳陽署病卒朱聞訃慟絕柩歸成服如婦禮或勸之他適矢死不移守貞三十年

周氏西犁鏵店人許字孔某未嫁而夫歿女聞卽自經父母急救之乃甦泣曰兒萬無生理若欲兒生非往事舅姑不可父憐而許之告其舅舅以貧有難色女志益堅不得已強迎之入門謁舅姑後椎髻布裙操井臼遇歲歉拮据供養積勞而卒鄉里惜之

右據府志後見陳穎所為傳較異且詳因併載之貞女為周克讓女許字孔繼惠子廣敷未婚而夫死聞訃輟炊投首花簪入室泣作白衣履且日成服欲往弔母不許固請歸夫家舅姑以貧三年不延乃絕粒待盡願一見姑面姑至引手捐心姑曰若非欲與吾兒合誓乎女領之遂絕耐墓孔林廣敷墓時乾隆元年也

卷之九十五終

列傳第八之三十五

男承炳編

胡安國曰女德不貞婦道不明能全其節守死不回見於春秋者朱伯姬耳聖人冠以夫諡書於春秋曰葬宋共姬以著其賢行勵天下之婦道也嗣是而後若秋胡妻之義不受辱明正德中孔顧氏輩之遇賊不屈皆為守禮死義不求生以害仁者而輕身殉夫雖例非特請不旌與死難者有間而夫死稱未亡人情窮晝哭誓與偕亡亦足振頽風厲末俗君子猶憫惜焉

宋伯姬 秋胡妻 孔顧氏 孔張氏 孔尋氏 孔

王氏 孔賈氏 孔胡氏 孔陳氏 孔王氏 孔宋

曲阜縣志卷九十六 列傳

氏 陳孔氏 劉傅氏 孔女 孔朱氏 顏氏二女 孔韓

氏 黃孔氏 王孔媛 朱周氏 顏賈氏 孔余氏

孔宋氏 高孔氏 孔姚氏

宋伯姬者魯宣公之女成公之妹也既嫁於宋共公七年共公卒伯姬寡三十四年至景公時伯姬之宮夜失火左右曰夫人少避火伯姬曰婦人之義保傅不俱夜不下堂待保傅來也保母至矣傳母未至左右又曰夫人少避火伯姬曰婦人之義保母不至夜不可下堂越義求生不如守義而死遂逮於火而死

秋胡子妻秋胡納婦五日去而遊於陳五年乃歸未至家見美婦人採桑道旁悅之下車謂婦曰力田不如逢年採桑不

如見貴郎吾有金願以遺夫人婦人採桑不顧秋胡遂去至家拜母母使人以婦至則採桑者也秋胡慚婦責之曰于東髮事親今出遊五年乃還而悅道上婦人以金與之是忘母也忘母不孝好色淫佚是污行也污行不義妾不忍見遂投河而死

孔公田妻顧氏明正德六年薊賊陷曲阜犯闕里氏遇賊不屈而死又孔公雷妻張氏孔公楊妻尋氏孔彥臣妻王氏孔弘憲妻賈氏孔彥霄妻胡氏孔德澤妻陳氏孔承浦妻王氏皆以不屈賊被殺孔彥麟妻宋氏陳思道妻孔氏劉拱臣妻傅氏皆爲賊所逼投井而死孔公縉女年十七亦爲賊所執義不受辱罵賊不絕口賊怒支解之

曲阜縣志卷九十六 列傳

二

孔聞籍妻朱氏媿顏氏及一女隨聞籍之西寧兵備道任所會番商馬安邦作亂積薪戶外俱投火中死

孔貞珏妻韓氏明末寇至抱子奔避爲寇所得挾之上馬韓據地大罵賊怒而殺之其子生甫數月猶匍匐血中泣且乳見者流涕

濟寧黃孫錡妻邑孔氏女年三十而始嫁善事舅姑居十年夫歿舅及伯使他適不從使從父母居年餘歸伯又併其廬而使宿於外氏不可伯益怒與其妻及子曳氏出氏曰未亡人乃爲伯手所曳耶遂自縊死年四十一

王綸妻孔媛字德卿明宿州訓導諭之女聰慧知讀書適綸未踰年綸沒女袖綸所讀書自縊死同棺而葬

明鎮國將軍朱勝妻周氏夫卒周自縊以殉

顏從道妻賈氏家貧寓滋陽年二十七夫沒自縊死遂同穴以葬

孔承鉅妻余氏文蕙女年二十二夫歿夜縊於柩前

孔尙變妻宋氏年二十餘夫渡河沒於水宋欲以身殉舅姑防守甚嚴一日侵晨忽失所在徧求不得有見水漚於池面者跡之則宋已投水死矣衣履皆縫綴密緻觀者驚歎

高曠妻孔氏庠生我平女于歸數載曠卒氏將以身殉父母舅姑力止之乃作苦供衣食居十八年子延年爲諸生則拜辭舅姑曰孫幸成立可以娛二人婦將從夫於地下矣遂不食死

曲阜縣志卷九十六 列傳

三

孔毓懿妻姚氏荆門知州士萊女幼端靜通經史性篤孝嘗割臂以療姑疾毓懿爲臨淄訓導卒於官姚治棺斂畢卽絕食三日卧不起臨淄諸生跪寢門請曰母不思反吾師櫬乎曷歸而後畢志姚乃起強食扶櫬歸家人謀所以葬姚曰丐於人則夫子不受若稱貸後將誰償室僅一婢鬻之以葬自爲文祭之復絕粒十有四日而卒知縣張若本立專祠祀之孔傳培妻苑氏夫病篤謂曰吾必不起汝年少無子奈何氏涕泣誓殉夫夫卒卽自經年二十二孔傳檜妻軒轅氏夫沒男旋瘍哭告夫靈曰妾負諾幸翁姑未老有兩弟誓不留此身累親卽自經

曲阜縣志卷之九十七

知縣楚安鄉潘相修

列傳第八之三十六

男承炳編

從一而終婦人之吉故節孝重焉而

國家成例命婦不旌以

特恩賜額祠祀者有恭愨衍聖公之生祖母陶氏今衍聖公之祖母王氏宜以弁於卷首而歷代節婦之年迹可考者吾得九十二人焉其無年迹者六十六人焉

陶氏 王氏 陶嬰 孔吳氏歐陽氏 孔楊氏 孔

劉氏 王孔氏 孔霍氏 陳孔氏 薛張氏 孔顏

氏 孔顏氏 董趙氏 王孔氏 東野劉氏 陳劉

氏 孔朱氏 傅王氏 孔顏氏顏氏 孔苑氏 孔

曹縣卷九十七

列傳

范氏 顏郭氏 孔冑氏 孔李氏 孔王氏 顏孔

氏 孔宋氏 徐孔氏 孔王氏王氏 郭孔氏 孔

陳氏 孔胡氏 顏孔氏 顏宋氏 孔陸氏 孔傅

氏呂氏 孔孫氏 孔黃氏 趙孔氏 陳顏氏 王

汪氏 顏孔氏孔氏 孔陳氏 王孔氏 王孔氏

孔韓氏 李岳氏 孔劉氏 孔李氏 孔魏氏 桂

馬氏 黃孟氏 叢孔氏 戴孔氏 陳胡氏 孟張

氏 隋趙氏 荀賈氏 鄭吳氏 張桂氏 孔孟氏

楊孟氏 呂孟氏 陳曲氏 孔陳氏 孔顏氏 孔

宋氏 孔張氏 孔賈氏 孔王氏 杜孔氏 孔祖

氏 孔韋氏 翟宮氏 屈孔氏 顏孔氏孔氏 孔

葉氏 孔朱氏 孔王氏 曲顏氏 孔顏氏 呂孟
氏 孔沈氏 孔上官氏 顏孔氏又有六十六人失
其年迹者載于後

陶氏大興處士承德之女也蚤寡撫子承祀子卒又撫孫再
世孤幼外侮頻仍賴陶氏以母兼父與師俾厥胄子成立為
賢上公

聖祖幸魯聞其賢

御書節並松筠四字賜之年八十一卒

賜祭葬如例

王氏大學士王熙之女孫配贈衍聖公孔繼濩年二十六而
寡孝事舅姑徐太夫人尤愛敬之其子衍聖公襲封以其

曲阜縣志九十七 列傳

德聞于

朝乞旌典

天子嘉之

賜御書曰冰霜勁節祀節孝祠

陶嬰者魯陶門門一作明之女也少寡魯人將求焉嬰聞之作黃

鵠之歌以自明歌見風類

按儀禮經傳通解云魯寡陶嬰者魯門之女也少寡養幼

孤無強昆弟紡績為產魯人或高其義將求焉嬰聞之恐

不得免作歌明已之不更二也其歌曰云魯人聞之曰

斯女不可得已遂不敢復求嬰寡終身不改

明孔認妻吳氏年二十四而寡遺孕生公攀撫以長娶歐陽

氏生子彥太未幾公擊又卒歐陽年二十六乃與姑撫彥太皆以壽終人稱再世節孝

孔彥禱妻楊氏年二十六夫卒無所出卽自經女奴排戶牖救之食貧苦節終其身

孔彥珍妻劉氏年十九而寡守節四十三年

王傑妻孔氏年三十而寡教子宗仁成進士

按選舉志無王宗仁爲進士歲

貢中亦止有王宗制王宗文附考

孔承贊妻霍氏年二十二而寡爲傭以養舅姑苦節四十年
陳思寬妻孔氏年二十八而寡朝夕卒瘞養姑撫其子苦節二十八年

薛巽妻張氏年十九而寡撫孤子養八十餘歲孀姑日夜採

曹縣志卷九十七 列傳

三

薪績麻以盡歡苦節四十年

孔公係妻顏氏年十八而寡撫弱息事舅姑四十年如一日
孔弘進妻顏氏年二十而寡六十七卒

董三思妻趙氏夫沒子生始周月姑年七十仰事俯育皆盡道

王思晉妻孔氏承唐女年十九而寡六十餘歲卒以苦節稱
東野義妻劉氏年二十一而寡教子有成

陳應夢妻劉氏年二十四而寡守節終身

孔貞雷妻朱氏教其子稱苦節

傅時雍妻王氏年二十而寡七十餘歲卒

孔弘祚妻顏氏年二十一而寡撫其子聞器娶室顏氏氏年

十九而聞器又卒顏氏與孀姑矢共守年五十八卒有司表之曰一門雙節

孔承展妻苑氏苑昇女年十九而寡撫養六月孤兒克成立孔承元妻范氏滋陽范東奇女隆慶元年承元陪祀辟雍以疾道卒氏匍匐扶喪歸守節終身

博士顏亂宗妻郭氏年二十而寡教其子承大宗祀

孔承筠妻閭氏年二十一而寡家徒四壁孝養其姑姑死水漿不入口者四日苦節五十餘年

孔聞義妻李氏年十八義卒無子弟幼弱氏乃撫義弟而恢其業

博士孔胤桂妻王氏濟寧州大理寺卿湘之女年十八而寡

曲阜縣志卷九十七 列傳

四

孝其姑訓其二女有壺範

顏 妻孔氏名弘坤蚤寡而孝事舅姑舅姑沒廬墓終制然後歸有石刻在顏林

生員孔尙仔妻宋氏年二十二夫卒守節四十五年有司欲旌之宋固辭曰此自婦人分何旌爲

徐繼擢妻孔氏承楫女年十九甫生子而夫死守節五十餘年

孔聞宦妻王氏年二十而寡有子貞朗長亦娶王氏居三年貞朗又沒遺孤尙運甫數月長娶杜氏逾年又沒孤衍鳳生甫彌月三媿婦共撫之有司旌其門曰三節

郭某妻孔氏興紆女蚤寡子及孫曾三世皆天苦志以守終

其身

孔尙鍼妻陳氏年二十而寡孝舅姑撫幼孤壽六十四而卒
孔興裕妻胡氏夫沒舅姑老子毓洵生甫兩月竭力養畜苦
甚康熙四十三年鄉里欲以其狀聞氏慘然辭曰未亡人誠
不意有今日今至此幸矣敢邀旌乎乃止
顏紹範妻孔氏年二十七夫卒將以身殉舅姑以其有遺孕
泣止之居兩月子懋楓生苦節終身

顏衍鶴妻宋氏年二十六鶴卒三月生遺腹子伯逼之他適
乃撫孤慟幾絕伯怒遷於滕氏無依值兵荒東西逃竄幾不
保後幸無害及見孫曾卒年六十有七

孔毓玠妻陸氏柏鄉知縣賓女年十九而寡持喪甚哀孝舅

曲阜縣志卷九十七

列傳

五

姑撫其嗣子傳派克有成官至瓊州府知府

孔興調繼室傅氏年二十二而寡撫子毓琰成立守節五十
餘年毓琰娶妻呂氏亦二十二而寡守節三十四年

孔衍海妻孫氏年二十七而寡守節三十餘年

孔興嗣繼室黃氏年二十五而寡守節四十年

趙之芳妻孔氏于歸踰年而夫沒養舅姑教子成立

陳大經妻顏氏守節四十年內言不出外言不入閨門嚴肅
爲宗黨所師

王峻烈妻汪氏弱年而寡養舅姑撫幼子無二志

趙建親妻田氏家貧蚤寡勤織紝以養二親稱苦節

顏肇奇妻孔氏興景女結褵甫二載而夫死苦節自守雖極

貧奉舅甘旨不敢缺

顏紹範妻孔氏舉人興祥女年二十三而寡親織紵以養姑而自食橡實其夫從弟紹節妻亦孔氏女夫卒舅姑以貧勸他適則嚙指誓曰吾姊能然我寧非人必不相容有死而已兩婦相依終其身

廩生孔興京繼室陳氏年二十五而寡矢志苦守撫前室子以成立

王嘉進妻孔氏年二十三而夫與舅姑相繼卒治三喪甚竭力遭歲歉携幼孤流離備嘗艱辛卒能教子有成復舊業

王嗣濂妻孔氏年二十而寡得舅姑歡撫二子嚴慈並濟俾爲諸生卒年八十有五

曹縣卷九十七 列傳

六

貢生孔銑妻韓氏年二十四而夫歿矢志守節翁宦遊粵中氏以冢婦留主家政衣縞茹素儉勤雍肅歷三十五年

李本愚妻岳氏年二十二而寡撫孤守節四十餘年

尼山學錄孔毓健妻劉氏年十九而寡誓死靡他事孀姑撫嗣子以孝慈聞

孔尙台妻李氏年二十七夫歿姑老而聾瞶且癢痺旦夕扶持左右奉養姑感其節孝每執氏手嗚咽不能語見者泣下孔興擴妻魏氏年二十六而寡八十有三而卒余爲墓表曰乾隆之三十八年某月某日四氏學茂才孔毓璣奉其旌表節母魏太君之喪合葬於故父上舍孔公之墓禮也上舍墓故無表毓璣請予爲文併表之予謂節母之賢已表矣而上

舍之生平以蚤亡不獲著僅著於節母之命毓璣有司者弗爲之表是使賢者終沉晦不一見且無以見節母之賢之代有終也乃拜手而序之曰上舍諱興擴字蘊行爲前觀察使孔公聞詩之元孫聞詩子貞燿生子三人伯曰尙愉爲世尹有惠政崇祀馨宗仲曰尙恒季曰尙恪皆勅封文林郎上舍以尙恪孫爲尙愉子衍滋後自少卓犖不羈入廟學卽援例貢成均年踰弱冠卒於時節母年僅二十歸孔氏甫六載苦節自誓撫兩女拊播家政久乃得立尙恒之曾孫毓璣爲嗣子蓋去上舍之亡二十有八年而節母亦年四十有八矣當是時節母耳耳兩弱女一適遂寧張勤政一適泗水尤昭禮相繼歿血淚盡枯惟日劍負此呱呱兒懼倍甚食飲燠寒不

曹壘卷九十七 列傳

七

一假媪婢手比入小學親教之六藝就外傳歸必課其所習爲之解文義嘗涕泣命毓璣曰汝父性頴古而質於行顧齋志歿汝若克揚名顯汝父汝父爲不亡吾乃可亡又曰汝父事所後及本生皆盡歡墓祭盡禮命子遵守弗稍忘家故三世同居羣從娣姒宛若先後皆以吾爲冢婦有加禮汝父顧日諄戒吾不友無禮於諸介婦且母私田宅錢帛餘則以周匱乏以是人不我尤家日落春秋上林墓則又涕泣曰汝家爲觀察公宗子再世立後吾今旦暮老安得早抱孫弗孤子吾且卜吉改葬先亡人吾乃可亡其言俱深痛不可聞已而節母以乾隆三年戊午旌節孝又六年而遷上舍於新兆又六年而見孫傳鈞又三年而見毓璣補弟子員又十三年而

見曾孫繼崇又三年而歿享年八十有三嗚呼節母六十三
年之苦節於是而始爲安節之亨矣節母之先世曰河南左
布政魏公肯構爲曾祖厥考文學元祚與弟孝子嘉祚稱二
難其妣孔夫人爲世尹興認女節母生而端淑又習於姆訓
者最久故上舍以文行顯而節母相之上舍之文行晦而節
母宣之在易恒之五曰恒其德貞婦人吉坤之三日含章可
貞又曰無成有終而文言以妻道與臣道并論之嗚呼上下
經之第二卦皆若爲節孝繫之繇者然然則惟恒其德者乃
克代有終有終則夫子之事成无成者其成不旣多乎哉余
又以知上舍之晦於數十年而表於一日者固節母之代有
終抑亦以見賢者之終不湮沒而且必有後也毓璣尙氣誼
喜爲古文辭其顯揚之望固於是乎在所爲節母行述甚詳
明余謹掇其大者著於碑

曲阜縣志九十七

列傳

八

貢生桂公琰第三妾馬氏公琰與妻孔氏歿叔翁某利其產
以計先嫁其兩妾次及馬馬怒詈拒之某意詛馬竟爲內主
撫妻之四女如已出立侄綸爲琰後守節四十餘年
黃雲襄妻孟氏年二十七而夫亡撫育三子苦節五十餘年
叢世勲妻孔氏年二十一而夫歿育遺腹子克成立歷五十
餘年

戴育貞妻孔氏年十九而夫亡無子矢志苦守歷四十餘年
生員陳乙妻胡氏年二十九而夫卒撫孤守節亦四十餘年
孟璟妻張氏年二十四而夫歿矢志守節奉孀姑撫幼子孝

慈兼盡

隋光勉妻趙氏年二十一而寡時祖姑年逾九旬舅姑亦垂老竭力奉養俱盡歡送厥終亦哀毀兼盡君子以爲難荀文誠妻賈氏年二十四而寡撫嗣子成立苦節終身

鄭五妻吳氏年二十四而寡遺孤甫八月隣婦慙患他適正色叱之曰烈女從一人之行也汝柰何狗彘我隣婦慚而退氏守節三十八年

張兆煜繼室桂氏年二十六夫亡無子携一女依母氏居數年歸立嗣子承夫祀

孔毓鼎妻孟氏年二十六而寡撫孤守節歷三十年

楊憲夔妻王氏夫蚤亡氏葬之盡禮後連遭十餘喪百計安

豐縣志卷九十七 列傳

九

厝撫三弟子成立茹苦辛四十餘年

呂澣妻孟氏年二十六而寡撫孤守節三十有五年

陳九敘妻曲氏年二十夫卒子蒞甫三月撫之成人娶劉氏不數載蒞復沒遺襁褓孫與劉同撫育之歷三十有五年

孔興理妻陳氏年二十一夫卒不以無子改操苦守三十四年

孔毓琪妻顏氏年二十二而寡育一遺腹子守節三十有二年

孔傳歡妻宋氏年二十而寡孝其姑撫子爲後守節終身

孔衍海妻張氏年二十八夫亡子興棟甫一歲以養以教俾

成人人稱賢母

孔貞觀妻賈氏年二十七而寡侍姑寢溫清定省二十餘年如一日

孔傳勲妻王氏年二十四夫卒遺腹生一子翁老而癱瘓氏奉藥餌羹飯十餘年不倦翁常語人曰吾無以報子婦但願婦子孫世世如子婦孝

杜克忻妻孔氏歸杜三年夫卒無子欲以身殉姑泣諭乃止撫嗣子養老姑矢志苦節未幾以疾卒

孔毓志妻祖氏年二十九而寡養親撫孤守節三十餘年

孔傳休妻韋氏年十八而寡撫姪承祀苦節終身

翟應祥妻宮氏年十八而夫亡撫三月孤俾成立守節五十餘年

豐縣卷九十七 列傳

十

屈文彬妻孔氏年十九而寡越四月生遺腹子撫育守節奉舅姑曲盡孝養閱三十餘年

顏懋賢妻孔氏尙誠女夫亡守節四十年

顏懋英妻孔氏尙泰女其姑張本少寡而懋英又早世子崇楫生甫三歲婦與姑共苦守教子嚴厲不少假借俾崇楫舉子鄉有夫從弟懋芹蚤夭遺妻亦孔氏迎與同居事事資給之共守節以老焉

孔毓洙妻葉氏守節四十餘年

生員孔尙恪妻朱氏孔尙任有傳

孔興人妻王氏母尹以節著氏年二十而夫卒再撫弟之子俱不祿己更撫從孫傳楷苦節六十餘年

曲振萃妻顏氏年二十二而寡養塋舅姑撫姪爲夫後嚴毅不苟守節二十五年

孔傳浩妻顏氏年二十夫卒無子矢志守節六十餘年

呂瀚妻孟氏博士衍泰女曲靖守世鑑冢婦年二十六而寡守節三十八年

顏肇充妻孔氏歷城諭毓榮女年二十四而寡痛絕復甦曰生當立孤耳已乃立夫弟肇廣之次子懋价爲嗣教之成名士守節四十餘年

博士孔傳懿妾沈氏長洲縣人夫主病甚暑月竟自跪禱烈日中已而服除君姑黃太夫人勸其他適涕泣剪髮嫡子禮之以庶母不肯受日勤操作年老目昏無怨色親族欲以其

曹縣志卷九十七

列傳

十一

節聞卽固辭大宗女君戒勿令知爲請旌

孔毓坦妻上官氏年二十而寡守節二十六年而卒又有贈

禮科給事中孔宏山妻陳氏孔習妻沈氏孔公庶一作庶妻宮

氏孔宏柱妻王氏孔宏智妻顏氏孔聞敕妻王氏史全經妻

孔氏衍聖公孔貞幹妾郭氏孔尙侗妻顏氏孔興嗣繼室王

氏孔興調繼室王氏孔興學妻傅氏孔衍海妻孫氏孔貞德

妻孫氏陳士柱妻孔氏孔尙恂妻顏氏孔尙祿妻朱氏顏振

之妻王氏孔衍棟妻楊氏孔衍鑑妻吳氏魏成妻孔氏孔毓

懿妻楊氏孔興仔妻周氏孔興京妻陳氏孔興煜妻黃氏趙

璋妻顏氏孔興揚妻桂氏顏紹渠妻孔氏陳宏勳妻范氏孔

毓漢妻顏氏孔毓富妻董氏顏紹允妻張氏孔傳煥妻章氏

岳士粹妻褚氏馮天文妻王氏孔傳培妻苑氏鄧可瑚妻孔氏薛維敬妻孔氏閆化玉妻顏氏孔毓幾妻張氏顏紹乾妻孔氏朱邦榮妻劉氏魏儻妻孔氏顏光繪妻孔氏鄧可官妻張氏顏紹眼妻孔氏單良士妻宋氏顏熙治妻孔氏顏光敏妾金氏顏衍傲妻孔氏顏崇玖妻姚氏劉光祖妻顏氏顏紹珩妻孔氏婁士俊妻馬氏婁師首妻龐氏高士景妻陳氏孔衍祚妻柴氏宋允徵妻孔氏孔衍鉅妻王氏郭大智妻孔氏顏懋桂妻孔氏郭大有妻孔氏顏紹謨妻孔氏顏懋崧妻孔氏顏懋健妻王氏孔毓護妻王氏顏伯瑛妻孔氏武良欽妻郭氏孔毓璋妻顏氏顏嗣坤妻孔氏孫立妻陳氏朱世培妻商氏陳意善妻孔氏顏伯松妻孔氏趙之芳妻孔氏顏紹德

曲阜縣志卷九十七

列傳

三

妻孔氏顏弘緒妻武氏徐思明妻陳氏孔尙象妻朱氏孫梅

妻顏氏毛文科妻呂氏

孔傳培妻苑氏已入烈婦傳餘俱補載其畧於左

監生王德

峻妻桑氏年二十二而寡苦節撫嗣子成立教以禮寓寧陽

邑令毛匾其門武生孔貞德妻孫氏年二十二而寡養孀姑

四十餘年延明師訓子子歿遺孫三媳王氏稱姑志矢靡他

閆化玉妻顏氏年二十九遭崇禎壬午之變堯城陷一家被

難氏念姪七月冀保全延一脉倉皇走避折脛墮胎死復甦

匿屍堆內七日弟負以歸苦守撫女贅婿殤歿撫義孫長齋

禮佛奉翁姑及夫神主歲時忌日哀號感比鄰康熙三十七

年卒馮天文妻王氏年二十三夫歿無期功親可爲後請其

父恒修勸翁納妾張氏翁歿氏事姑備苦辛志彌堅張感氏

義亦與共守不他適陳士柱妻孔氏年二十六而寡事翁姑撫育二子間出其餘濟族之貧者婁士俊妻馮氏年二十八而寡姑老而盲侍奉能承志睦親族賑糶孤人多其義劉光祖妻顏氏年二十九夫歿欲身殉翁曰死易撫孤難乃收淚孝翁姑養教孤子克有成郭大有妻孔氏廩生毓珥女年二十四而寡教其子鴻圖爲諸生鴻圖歿其子數歲又歿氏慰諭寡媳與共守舅元亨九十八歲艱步履日親扶持不稍懈顏伯瑛妻孔氏年二十三夫歿無子育姪爲嗣事翁姑四十年不違忤顏懋健繼室王氏年二十九守節事其翁翰博紹緒能秉禮撫前出子四人已子一人均平無間言顏紹讓妻孔氏年二十六而寡苦節四十年孔輿揚妻桂氏年十八而寡苦節三十三年朱世培妻商氏年十九而寡苦節四十八年孫立廬妻陳氏年二十四而守節闕四十四年賈毓沂妻孔氏年二十五而守節闕二十五年

曲阜縣志卷之九十七終

曲阜縣志卷之九十八

知縣楚安鄉潘相修

列傳第八之三十七

增黃廕元編

國家德茂恩龐緝熙純嘏薄海民庶莫不綏多福享遐年直省大吏歲各舉百齡民婦錫予坊表民曰昇平人瑞婦曰貞壽之門其踰乎百齡者特賜白鏹文錦蓋幸生仁壽之域所致亦其人有以自求之者余於乾隆庚寅訪得邑之壽婦百有三歲者賈倪氏一人百有二歲者胡張氏一人百歲者楊孔氏顏孔氏二人皆以次上聞得旌倪氏張氏俱得邀加賞如例辛卯仲春恭逢我

皇上以六旬

萬壽聖主敬奉八旬

曲阜縣志卷九十八 列傳

一

萬壽聖母皇太后拈香岱嶽臨幸闕里此百歲以上之四人率七十八十九十以上之老婦千有餘人建設壽棚樹立黃幟敬書叩祝

萬壽叩謝

恩賞字樣屆日各衣鶯衣帶銀牌手藝名香夾道列跪祇候安輿經臨齊聲一口同効嵩呼

慈心歡豫

天顏喜悅仍予普賞形諸

奎章真太平之盛事爲從古所未聞茲謹序列於志紀其淑行用見

純禧之高厚悠久而未獲與旌採訪有徵者亦附載焉

賈倪氏 胡張氏 楊孔氏 顏孔氏 孔王氏 陳孔氏

賈倪氏吳孫社倪永年之室女相夫志學事舅姑得其歡夫年亦八十餘氏與夫無戲言夫疾事之維謹夫卒能盡禮教子孫有法度乾隆三十六年年百有四歲率諸子孫婦來迎慈輿於壽棚服飾整肅不簡率余往慰諭饋旨甘猶跪謝拜起自如不藉持扶力余命諸孫拜之猶答揖其恭謹如此

楊孔氏崇聖社孔衍平室女爲楊居讓妻姑王氏盲而痺氏侍起居扶持不稍離家故貧躬親織紡不以老懈教子振先爲生員諸子孫皆延名師訓課使遵禮法閨門之內肅肅如也

曹懸九十八 列傳

二

顏孔氏顏光琇妻東忠社孔尚貞室女氏翁姑俱八旬餘歡奉水菽無違志喪葬皆盡禮尤念聖裔倍須知理義課子孫曾孫皆讀正書務本業不以貧故一事曠行乾隆三十六年年百有一歲神明猶不衰

胡張氏胡公珩繼室東忠社張志長室女公珩蒙衍聖公咨授至聖林廟守衛百戶任事十二年賴氏主中饋無內顧慮得以恪恭廟務無曠廢子○○老於諸生孫曾奉法皆氏訓誨力氏以夫貴應受

誥封未及請疊蒙

恩賞老婦銀米氏不敢稱民婦冒領有司嘉之

孔彥喆妻王氏年二十五而寡撫教子及孫宏復等各敦素

業享年百有二歲有司表其門

陳孔氏守衛林廟百戶陳○○之妻夫歿教子成立撫從子
如已出康熙四十九年魯諸生匾其門曰壹儀上壽蓋年百
有三歲云

曲阜縣志卷之九十八終

曲阜縣志卷九十八

列傳

三

曲阜縣志卷之九十九

知縣楚安鄉潘相修

闕疑

男承焯編

諸子所稱多寓言尤好語怪若桓山之鳥吳門之練厄陳之鯁魚相魯之集鳳與夫群鵲培城夢麟吐經諸所流傳甚夥其文不雅馴存之徒以益惑惟群儒所爭辨而迄無定論者茲編多隨事考正附於各篇其有未載者彙爲一卷用質所疑於博雅君子云

諸書言神農黃帝顓頊帝舜已見圖考王子年拾遺記有皇娥白帝歌不知何時僞作其言曰少昊以金德王母曰皇娥處璇宮而夜織乘桴木而晝遊經歷窮桑滄茫之浦時有神童容貌絕俗稱爲白帝之子卽太白之精降乎水際與皇娥

曲阜縣志卷九十九

闕疑

一

讌戲並坐撫桐峯梓瑟皇娥倚瑟而清歌歌曰天清地曠浩茫茫萬象廻薄化無方滄天蕩蕩望滄滄乘桴輕漾著日傍當期何所至窮桑心知和樂悅未央皇娥旣歌帝子答之曰四維八埏耶難極驅光逐影窮水域璇宮夜靜當軒織桐峯文梓千尋直伐梓作杼成琴瑟清歌流暢樂難滄滄海浦來棲息又羅泌窮桑辨云空桑在東窮桑在西歸藏啟筮云空桑之蒼蒼八極之旣張乃有羲和是主日月職出入以爲晦明蓋指碣夷之地故記孔子生於空桑春秋演孔圖云徵在游於大冢之陂慶黑帝謂已汝產必於空桑而于寶所記徵在生子空桑之地今名孔竇在魯南山之穴故孔廟禮祀碑云顏育空桑空桑魯北孔子魯人故說者指云空桑槩而

言之魯南山穴之說正自戾矣乃若共工氏之振滔鴻水以薄空桑則爲莘陝之間伊尹莘人故呂氏春秋古史攷等俱言尹產空桑空桑故城在今陳留固非魯也故地記言空桑南杞而北陳留各二十里有伊尹村而所謂窮桑則非此矣拾遺記言窮桑者西海之濱也地有孤桑千尋蓋在西垂少昊之居梁雍之域故周書嘗麥云帝命蚩尤宇於小顛而遠遊章句西皇所居西海之津西皇者少昊之稱而小顛者少昊之正字也宜爲咸陽故咸陽曰雲陽而少昊亦曰雲陽氏雲陽縣今隸耀州甘泉宮卽武帝之秦時也顛頊繼少昊者故世記顛頊亦自窮桑遷商邱事可知矣而杜預遽以窮桑爲在魯北至釋例地名乃云地闕故顛達云言魯北者相傳言爾蓋以定四年傳封伯禽於少昊之墟逆之而樂史之所記乃在曲阜此又因預而妄之也太昊在東少昊在西予旣言之拾遺遠遊窮桑旣在西極則魯曲阜之說得非太昊之墟乎郡國志云少昊自窮桑登帝位非空桑也

文王廟已見通編明堂毛奇齡謂卽出王配帝所其言曰古明堂之制原爲饗帝而設后稷旣配天於郊文王則配帝於明堂孝經所云宗祀文王於明堂是也魯本侯國文王以出王之故大宗之國不祖而宗因特立周廟在祖廟之外又特設明堂爲出王配帝之所本在魯地後爲齊有註者謂爲王者聽政之所旣多不合孝經所言專指此太山明堂爲言世又不曉云云今考明堂遺址在太山東北四十里旁有谷山

寺去曲阜幾二百里與禮書所言明堂在國南丙巳之地三
里之外七里之內之語不符且魯君亦必無每歲北走二百
里而行宗祀禮之理西河汲汲於攻朱不自知其難通也
外紀曰魯惠公使宰讓請郊廟之禮王使史角往魯公止之
陳氏謂郊禘非成王之賜伯禽之受前編亦以程朱爲誤毛
奇齡云魯祭文王得用天子禮樂以出王故祭出王者以宗
子故若公子友以適子爲宗卿亦得祭所自出而立桓公一
廟漢儒不解有謂公廟設於私家者不知此正三桓所自出
之廟故稱三家堂以季氏爲大宗故又獨稱季氏但祭文王
廟得用天子禮樂太廟世室皆不得用群宮愈不可用故夫
子以爲僭今按唐高郢魯議云成康過賜非禮也魯君受賜
亦非禮也程朱之前蓋已有是說云

毛氏又云趙岐孟子注周公惟管叔弟也故愛之管叔念周
公兄也故望之孔氏傳云周公攝政其弟管叔及蔡叔霍叔
放言誣公則管叔果周公之弟矣孔氏謂殷法兄終弟及周
公次武王與殷法合故流言趙注非無據也

尹氏公穀以爲周大夫尹氏左傳以爲君氏毛奇齡乃謂因
公於尹氏尹氏者鄭大夫也說書而求新奇亦何所不至耶
虞子集靈節畧孝經緯曰孔子七十二歲語曾子著孝經因
著作旣成乃齋戒向北斗告備忽有赤虹自天而下化爲黃
玉刻文先聖跪而受之援神契曰孔子制作孝經使七十二
子向北辰罄折曾子抱河洛書北向孔子簪纓筆衣絳單衣

向北辰而拜

李贄閩甫著疑耀篇云孔子眉有十二采孔叢子述子思之言乃云先君生無須眉謂先聖雖少年未有眉須時天下王侯亦皆起敬非謂無須眉也方言東齊謂老曰眉此言無須眉者猶云未須而老也非眉毛之眉人豈有無眉者

世傳孔氏三世出妻皆由於檀弓孔氏不喪出母一語賴古堂文選載張世經辯一條其說甚詳大約謂出母者生母也非出妻之出不爲伋也妻者妾是也蓋齊王子欲終喪而不可得之類此以檀弓爲經而曲爲之說也檀弓不又云伯魚之母死期猶哭乎正義曰伯魚母出考孔子十九歲娶元官氏二十歲生伯魚不得謂其母爲生母檀弓不又云子思之母死於衛且曰庶氏之母死乎注云伯魚卒其妻嫁於衛庶氏考伯魚之卒年近五十豈有其妻猶嫁之理禮記本非經此數條與孔子少孤不知其墓等語尤爲邪說誣聖刪之可也

端門路史云在孔廟東南十一里公羊何休傳云得麟之後天下血書魯端門曰趨作法孔聖歿周姬亡彗東出秦政越胡破術書記散孔不絕子夏明日在觀之血書飛爲赤烏化爲白書又云聞端門之命有制作之狀乃遣子夏等求周史記得百二十國寶書修爲春秋是仍春秋爲漢制作之說也闕里志云孔子墓北有虛墓五間皆石爲之至聖歿戒弟子爲虛墓後果遭秦始皇發掘得石壁文云後世一男子自稱

秦始皇上我堂躍我牀飲我酒漿顛倒我衣裳至沙邱而亡時有白兔自墓中出始皇逐之至曲阜十八里溝而沒魯人

因呼其溝曰白兔溝丹書坊卽鍾離意所發夫子甕之書也

見水經注已載縣境圖考後鍾離意埋丹書爲坊以識之其

址在城北門外闕里文獻考云事皆妄誕不經大都出緯書

之附會耳余門人同里劉志士有文云世所傳秦始皇事前人已屢辨之予以爲始皇欲廢者夫子之書也廢

夫子之書而坑其誦法夫子者不過以古法不宜於今而師

夫子者之能亂秦法耳彼亦何所積怨於夫子而思以快一

朝之忿哉且夫始皇之焚書亦諸儒爲之也諸儒爲之不知始

皇之不可與復古欲掉三寸之舌以易其詐力之雄而所抗

言於秦庭者不過封建數語其下者乃議封禪求奇藥致真

人又不可逞焉則相與許而逃之以始皇之剛戾自用固宜

其激而變生也然則始皇所坑者特盧生侯生之徒耳使七

十子而在者當不至坑而死而謂聖人之禍且及此哉今觀

其文不雅馴亦若出於夫子之自言者不知弟子承夫子遺

命而刻之耶抑夫子歿而其神自爲刻之耶其所稱虛墓五

焚書亦若是焉已矣

石麟灣皇覽云洙泗交處有石麒麟水之精也吐玉書於闕

里每孔子生日魯人浴之以祈嗣今水涸莫知所在

香祖筆記云周郭威親征慕容彥超至兗州夢文宣王明日

攻其城入之過夫子廟叩首再拜按周主祠孔子五代史載

之甚詳王士禎獨信夢文宣王之語亦其記醜而博之一端

也

香祖筆記又云鄭端簡云十哲陳蔡一時與難之賢非孔門

定論自開元至今無敢議者夫有若之言四見於論語大類

聖人公西赤志於禮樂有爲邦之才亦優於宰我冉求宜進
祀二子於殿上改求我於廡中云云今按有子已升十二哲
矣惟公西氏尙待論定耳

子路宿於石門閻潛謂郭門者爲荒誕卽今石門山在邑東北
謂卽石門山毋論謂郭門者爲荒誕卽今石門山在邑東北
五十里豈尙有晨門不知子路反譏孔子情事尙任誌石門
特詳王士禎信之孔貞瑄又謂爲尼防之後障秦岱之門屏
夫子作琴操於此李杜徃來唱和爲儒流所尙山外崇陵複
沓大美中涵蒲溪一水渟滄爲湖更踰一嶺始達山足峯巒
秀異隧澗幽遐芳樹翬雲竒葩絢日古藤拳曲數十丈蜿蜒
如虬龍有玉笋峯芙蓉巖鳳凰岡桃花巖孔聞詩與郭本嘗
讀書其中大抵至聖發祥之地岱爲祖山嶧爲朝應汶泗潔
帶尼防結穴皆與石門血脉相通詳見聊園集

曲阜縣志卷九十九 闕疑

六

龜蒙俱在泰安嶧山在鄒縣獨鳧山失其所在孔貞瑄云曲
阜南鄉十八里有馬鞍山兩峯聯翩狀若飛鳧山前之曠名
傅村傳或鳧之訛歟按郡縣志鳧山在兗州鄒縣東南三十
八里或云東當作西其卽貞瑄所指歟按後漢書郡國志濟北國有敖山注云左
傳曰先君獻武廢二山卽敖山具山今亦無傳

防山南瞰九龍北臨泗水三峯矗起孔貞瑄謂似鍾山又云
啟聖墓龍脉當以防爲主山午山兼丁而迎泗水子丙兼癸
山脉西行啟伏三十里抵洙源入聖林結穴遂止不去

尼山背倚二龍山面五老峯孔貞瑄以繞室降庭爲山靈所

化雖神其說亦或有之。祖來郡縣志亦曰：尤來山在兗州乾封縣乾封，卽今之泰安縣，不應入曲志。惟新甫山後魏志魯郡汶陽縣有新甫山，九域志襲慶府有新甫山，通典、漢汶陽縣故城在兗州泗水縣東南，據此數說，似新甫山在曲阜境內，而今不可考矣。

孔顏生卒之年已見通編，閩南鄭瑗井觀瑣言云：史記顏回少孔子三十歲，三十二而蚤卒，是時孔子蓋年六十二。家語記孔子年二十而生，伯魚伯魚卒時年五十，計其年當在顏子之後。今其死旣在顏子之前，則孔子亦當六十以下。子思之生又不知前此幾年，然則孔子卒時子思亦不甚幼。孔叢子所載難以斷其必無，再史記年表孔子之卒去魯繆公之

曲阜縣志卷九十九 闕疑

七

立七十一年而孔叢子載繆公薨時子思居衛，孟子亦屢言之。則史記年表錯矣。今按孔子卒於壬戌，至繆公元年壬申七十一年，又二十五年甲辰方卒，共九十六年，猶云子思居衛，又云縣子聞喪而服，子思弗服，又適齊，自齊反衛，自衛反魯，教授又不知幾年，乃卒，是距子思逮事孔子之時當百餘歲矣。史記乃云六十二歲，闕里文獻考又以六十二爲八十，二皆不合。然則史記與孔叢子所載皆未真也。

前史謂曾子居南武城，顧炎午謂卽今費縣，明費入王雅量有辨，更詳自明成化中山東守臣上言嘉祥縣南武山西南元寨山之東麓穴中得懸棺，碣曰曾參之墓，遂以曾子爲今嘉祥人，蓋以南武山爲南武城也。

南容朱註謂卽南宮縉南宮适南宮敬叔毛奇齡謂容與縉似一人家語檀弓與論語相合若适不知何人也孔氏以爲卽容史記索隱謂卽敬叔皆非也敬叔本公族與家語及王肅論語注稱容爲魯人者大別敬叔從孔子適周見金人臧口孔子戒以謹言事與容無涉朱注於白圭章曰事見家語不過以諱言與白圭相類耳又朱註謂敬叔卽懿子之兄考昭十一年泉邱女生懿子及敬叔且兄伯而弟叔敬叔也毛氏勇於攻朱此一條猶近理

今天下府州縣庠序多祀文昌魁星乾隆十六年知縣孔傳松創建魁星樓於東南城上或謂此爲祀典所無魯則奎宿所纏有圖書武庫之象宋初五星聚奎大儒繼起似應祭祀

然奎也非魁也余按史記斗魁戴匡六星曰文昌宮一曰上將二曰次將三曰貴相四曰司命五曰司中六曰司祿魁下六星兩兩相比者曰三能祭文昌魁星者應以此世人稱文昌曰梓潼帝君則益惑矣余有文昌宮記其辨甚詳

滋陽進士牛運震八蜡辨蜡之神有八先嗇一司嗇二百種三農四郵表曠五猫虎六坊七水庸八以陳祥道禮書之說爲斷至近日又祀劉猛將軍謂能驅蝗益覺不經各志辨之詳矣

漢有七緯其書不傳而其名甚險僻曰稽覽圖乾鑿度坤靈圖通卦驗是類謀辨終備者易緯也曰璇璣玲考靈耀刑德收帝命驗運期收者書緯也曰推度災記歷樞舍神務者詩

緯也曰含文嘉稽命徽十威儀者禮緯也曰動聲儀稽耀嘉
叶圖徵者樂緯也曰援神契鈞命決者孝經緯也曰演孔圖
元命包文耀鈞運斗樞感精符合誠圖考異郵保乾圖漢舍
孳佑助期握誠圖潛潭巴說題辭者春秋緯也鄭康成樊英
皆以善緯稱辨博張平子獨斥其僞秦政焚經楊廣滅緯秦
焚經而經存隋滅緯而緯亡

顏異顏安樂史不載為顏子幾世孫顏氏譜載真卿譜序云
孔門達者七十二人顏氏有八回居四科之首其後戰國有
率躅秦有芝貞漢有異肆安樂魏有斐盛盛字叔臺歷青徐
二州刺史關內侯其後子孫咸著宦族有若弘都之德行巴
陵記室之書翰特進黃門之文章秘監華州之學識肇自魯

曲阜縣志卷九十九 闕疑 九

國迄於聖代紛綸盛美舉集於斯顏氏家訓誠兵篇云顏氏
之先本乎鄒魯或分入齊世以儒雅為業徧在書記又云婚
姻素對靖侯成規其觀我生賦云吾王所以東運我祖於是
南翔去瑯邪之遷越宅舍陵之舊章又云經長干以掩仰注云

長干舊展白下以流漣注云靖侯以下七深燕雀之餘思感

桑梓之遺虔又注云至鄴便值陳興梁滅不得還南又云二
為亡國之人家訓又云鄴平之後見徙入關真卿撰顏舍大

宗碑銘曰鑠吾祖渡江游孝通神名軼古凡七葉墓白下本
支分源流附世忠義疊規矩翠鸞鳳炳龍虎文雅渙學鄒魯
赫才名振區宇亘今昔難悉數嗟末孫慙下武揚耿光媿無
取豐碑立百世親又家廟碑云系我宗邾顏公子封邾魯附

庸亞孔聖浴沂風刺青徐給事中護柳營渡江楓侍兄疾感
虵童隣火斷珥貂重施七葉傳孝恭武騎都尉司從便尺牘
繼魚臣慟君難憤而終咨記室遊湘東嗟禦正稟移忠衆黃
門擅文雄三昭長事東宮四穆叔史牢籠褒華州詁訓通小
秘書盛名鴻維太保文翰工位畿赤五褒崇登望苑友桂叢
三超贈保儲躬流光盛廟貌融永不祧垂無窮按顏氏自顏
盛由魯國徙居瑯邪臨沂由臨沂南渡又自江西徙長安顏
之推及真卿所載皆止於此諸史書亦未確指某某爲顏子
幾十世孫也今皆據舊志及顏譜載之

顏真卿墓廣輿記載在曲阜又云世傳公歿於賊縊者收瘞
之賊平其家遷喪還啟殯顏色如生握拳不開爪透手背觀
者異之今按顏氏譜及舊志不載公歸葬於魯此似誤也又

曲阜縣志卷九十九

闕疑

十

舊志載顏之推墓在縣東五里大道北曰侍郎林蓋輿所載
吳王墓在縣北三十里褚遂良墓在縣北八里者均傳訛不
足徵

孔子世家譜晉宋時一代不過數人孔愉以下雖多居會稽
亦猶今之寄籍云爾故依舊志各書入之自宋以後屬益疏
遠久而不歸故不載

孔顏曾孟之後雖居他縣猶爲曲阜人若睦弘漢書云魯國
蕃人蕃爲今滕縣夏侯勝魯人以居大河大河後更名東平
故爲東平人今俱因舊志載之胡氏所謂本據舊史因之而
不能改先儒傳授承誤而不敢增也他倣此

魏劉楨魯都賦僅十餘行至不可勝錄而止蓋闕文也故水經注有劉公幹魯都賦云戢武罷於有災之庫放戎馬於巨野之坳二語今所傳賦亦無之考古者何弗察也

李東陽詩禮堂銘序云金章宗謁廟時爲行幄以駐蹕比去有司請撤之章宗云留孔氏爲延賓齋遂止勿撤今燬於火銘曰有齋延賓金所駐蹕考金章宗未幸闕里博雅如李文正亦有誤乎

嘉定錢坫居揖墳壇二碑跋云右居揖墳壇二一曰上谷府卿墳壇一曰祝其卿墳壇皆居攝二年三月所造趙明誠金石錄曰上谷郡名祝其縣名不知府卿與縣卿爲何官案執金吾武榮碑云君吳郡府卿之中子榮父字開明永嘉中爲

吳郡府丞據此則府卿者乃府丞也然則縣卿卽縣丞耳官爲丞而號爲卿者蓋漢人之尊稱趙於古制未考故不辨此也又二石人胸前字跋云右石人胸前字二一曰漢故樂安太守庶君亭長庶君字季公韓勅造孔廟禮罷碑題名云故樂安相魯庶季公然則季公乃魯人也漢太守稱爲相者初景帝改郡守爲太守於諸侯王國則置內史成帝綏和中省內史卽令相治民如太守諸侯王之相可視太守是太守亦稱相之由也一曰府門之卒東漢刻石惟此爲篆文外皆隸

書耳

曲阜縣志卷之一百

知縣楚安鄉潘相修

補遺

男承熾編

前史自序云畧以拾遺補藝信哉乎遺之難拾也拾之詳矣猶云畧焉俗吏鯁生翫縷什一烏睹所謂詳者乎遺事遺文隨時拾之用以諭後之有心者

闕里志載鍾離意事畧其修廟考郡國志魯國注載漢晉春秋曰鍾離意相魯見仲尼廟頽毀會諸生於廟中慨然歎曰蔽芾甘棠勿剪勿伐况見聖人廟乎遂躬留治之注又云子思冢在孔子冢南案今墓書孫在祖前謂此爲驕孫祔又皇覽曰奄里伯公冢在魯城內祥舍中民傳言魯五德奄里伯公墓其宅

曲阜縣志卷一百

補遺

一

謝承後漢書云陳正叔爲太官令時黃門郎宿與正叔有隙因進食以髮貫炙中光武見髮勅斬正叔正叔曰臣有當死罪三熾以爐炭增冶吐炎焦爐爛肉而髮不銷臣罪一也拔出佩刀砥礪五石虧肥截骨不能斷髮臣罪二也臣與丞及庖人六目而視不如黃門兩目臣罪三也詔赦之收黃門左傳桓十四年宋伐鄭取午首郡國志云魯有牛首亭注乃引伐鄭所取以實之魏書地形志亦云魯縣有牛首亭

行有死人尙或殮之曲阜義冢十六社各置一區其在郭西三里者爲四方遊客旅殯之所明世尹孔燮立碑記

諸書所引孔叢子事皆本于宋朱咸注孔叢子序其詞云孔叢子者乃孔子八世孫鮒字子魚仕陳勝爲博士以言不見

用託目疾而退論集先君仲尼子思子上子高子順之言及已之事凡二十一篇爲六卷名之曰孔叢子蓋言有善而叢聚之也至漢孝武朝太常孔臧又以其所爲賦與書謂之連叢上下篇爲一卷附之於末然士大夫號臧書者所得本豕亥魚魯不堪其讀臣凡百購求以損益補竄近始完集然有語或淺固弗極於道疑後人增益乃悉誅去義例繁猥隨亦刪定因念彼鬼谷尉繚庚桑靈真淳夸汪洋之說尙且命氏於世矧是書所載皆先聖之言三代之術六藝之要在焉非諸子之流也又可泯而不稱邪故敢具所以然注而示諸學者云

墮三都之事人多疑之蘓軾嘗爲論其畧云田氏六卿不服

則齊晉無不亡之道三桓不臣則魯無可治之理孔子之用於世其政無急於此者矣彼晏嬰者亦知之曰田氏之僭惟禮可以已之在禮家施不及國大夫不收公利齊景公曰善哉吾今而後知禮之可以爲國也嬰能知之而莫能爲之嬰非不賢也其浩然之氣以直養而無害塞乎天地之間者不及孔孟也孔子以羈旅之臣得政期月而能舉治世之理以律亡國之臣墮名都出藏甲而三桓不疑其害已此必有不言而信不怒而威者矣

正名之說洪邁所言爲近其畧云里名勝母曾子不入邑稱朝歌墨子回車邑里之名不善兩賢去之安有命世聖人而肯居無父之國事不孝之君乎哉是可知已夫子所過者化

不令而行不言而信衛輒待以爲政當非下愚而不移者苟其用我必將導之以天理而趣反其真所謂命駕虛左而迎其父不難也則其有補於名義豈不大哉

程子云春秋傳爲案經爲斷以傳考經之事迹以經別傳之真僞夾谷之會郈費之墮

欽定春秋傳說刪左胡諸傳其論詳矣明席書嘗著上下兩論亦爲得之其畧云兵生於怨怨生於不平齊旣平矣胡復有萊兵之劫傳云齊出萊兵孔子歷階而升不盡一等視歸乎齊侯說以十餘言且曰而不反我汶陽田罷享禮誅侏儒目動神怒殆類曹劌齊柯之盟樊噲鴻門之會于聖人氣象大不侔也二氏欲墮二邑移辰墮之孟氏不欲墮郈公圍之而

曲阜縣志卷一百

補遺

三

不克以此見進退不在公而在三家而謂由孔子哉郈費克而成不能克何孔子長於郈費短於謀成也三家季氏最强孟氏最順何以行于強斯易行于順者卻難且墮郈費而至於命將帥師策已下矣費人入及公側計已踈矣命申句須樂頡下伐之而僅免功亦卑矣成人不服夫子曾不出一奇策擒處父而誅于兩觀之下至無功而還威亦褻矣後之人功則歸于仲尼過則歸於魯定設令仲尼再生必不以爲然也假曰圍成之時孔子去魯其與史記所載孔子十四年爲魯司寇季桓子歸女樂而後行其事又未合豈可信哉是皆由諸好事者欲神孔子之功而不知所以尊夫子也又曰尊孔氏者皆曰孔子拒強齊伐叛費文事武備於此見之夫孔

子之大豈惟此哉子貢曰固天縱之將聖又多能也多能已非孔子之極今以文武而贊孔氏欲尊之反卑之欲大之反小之也尊孔子者以道孔子之道堯舜禹湯文武周公之道也道卽太極太極卽萬變而無外孔子太極也所謂文武者固將一以貫之矣孔子曰天之將喪斯文也所謂文者道德之文也非文武之文也後世呂孔二祀文武兩途且謂孔廟曰文廟其亦未聞聖人之大道也已

余向學春秋亦疑及此此文更詳明故補存之

伊洛淵源錄載呂希哲家傳云元祐初程先生議請封建欲自封孔子後始公曰方今母后臨朝衆議不一扶傷敗如是足矣此豈大有爲時耶程先生默然而去按程氏文集修立孔氏條制但云添賜田併舊賜爲五百頃設溝封爲奉聖鄉世襲奉聖公爵以奉祭祀未嘗遽請行封建也

曹皇縣志卷一百

補遺

四

孔子世家之論言人人殊姜宸英云史公自序每一國必挈其事之至重者而著其所以作述之意其世家乎孔子者同之於列國之諸侯以其同尊周也遷序孔子曰周室旣衰諸侯恣行仲尼悼禮廢崩追述經術以達王道匡亂世反之於正云云作孔子世家第十七其意以諸侯之得世其家者以其知有天子而能匡亂反正以天子之權歸之於周者莫如孔子之功最大故附孔子於世家者非尊孔子也推孔子之心以明其始終爲周之意曰春秋非孔子則周道幾乎熄矣以孔子爲尊周而尊周者諸侯之事也故上不得比乎本紀而下亦不得夷爲列傳也或謂稱世家爲尊孔子者非也

儒言而墨行宋已有之孔道輔知徐州曰魯人石介守道上書云徐州諫議閣下聖人之道不行久矣魯周公之國也閣下聖師之後也道將興必自魯始魯將復聖人之教必自閣下先故天下常引領望於魯常一心屬於閣下今觀閣下於聖人之道可謂能篤勤服行而不倦者也魯之人則猶有儒言而墨行未盡入聖人之道者魯且如是遽然望天下之一歸於道豈可得也嗚呼周公死數千年矣聖師沒亦數千年矣經於秦歷於晋宋梁隋至於五代魯幾何不被髮而左衽也遭於老汨於莊韓亂於楊墨逼於佛道幾何不絕紐而墜地也今魯國服衣冠口誦聖人之書者不絕周公孔子之道未盡泯滅閣下復能力行之則所謂道將興必自魯始魯將

復聖人之教必自閣下先其不然乎介亦魯人也有志於道亦常凜然思有以佐閣下患乎其未能也顏太初魯人也實能焉則閣下已得之矣有姜潛故史館嶼之侄也介素所畏服其人存心篤道好學服善樂死忠義能守志節亦能佐閣下行道者也閣下俱收之使介三人佐閣下道其不行乎然則道之興果自魯始魯能復聖人之教果自閣下先伏惟大賢少留意焉近作文字數萬言實無可觀亦以見其用心編寫成輒敢寄去輕冒台嚴不任戰悚之至不宣介頓首

愚每讀之

竊爲感歎今曲阜城內卽有女僧道冠余欲革之而未能也嘗稟於撫軍其畧云鄒魯之地漸染聖化屏絕異端而文學又其天性故前明李東陽過闕里詩有一方煙火無庵觀三氏絃歌有子孫之句不知何時競立二聖五聖二郎三教等淫祠大村或五六小村亦有二三至乃林廟近地竟住僧尼老少男婦設立集會焚頂燒香稟其業次媒襲侮慢穢賣靡

雜且有生員崇信飯依斂錢勒碑前載某門某氏捐費後載某生授文書丹鄙俚荒唐恬不知怪卑職隨事照例審辦並出示曉諭令其講明義理遵奉律例知淫祠之爲非冀聖教之咸守又念卑邑有洙泗書院虛設講堂我

皇
上御製詩有注云是處雖號書院而內無肄業者蓋以爲廢陞也且邑中惟傑士名家猶傳舊業餘或因仍簡陋展轉傳授問以

欽頌經史四書文往往未學蓋由彈丸小邑應考童生不過六百人三年之內入文學七十餘名學憲每以聖里不置劣等不加貶語以是人多自是不能尋尋向今欲歛復書院以振之而束修篝火無從措辦惟查社濫祠地畝不書院十頃者許酌量裁減撥入書院收租選擇英才延請明師日與講論正學學習名文以庵觀無益之費爲絃歌有益之用去邪崇正似屬務一而兩得而卑職德薄人微有言不信積重難回恐滋煩擾伏惟大人悅周公之道紹孔子之學化馳若神風行甚速俯以卑職言乞留開具地畝清冊呈請裁酌施行則聖域賢關益感章教之功於不朽矣狂愚之見是否可行恭候訓示會陞濮州不果行

陸龜蒙陋巷銘云魯國千乘豈無康達傳載陋巷以顏居之

曲阜縣志卷十

補遺

六

鄙委側僻樞桑覆茨簞瓢屢空其樂怡怡聖人之言終日不違易贊獨入云顏庶幾門直大道堂如翬飛梁肉在御狼貪豕肥陋巷相去不其遠而我實狂狷蓬蒿所宜勒於柴荆賢哉是思

劉敞顏魯公文集序云魯公極忠不避難臨難不違義是其塵垢糠粃猶祇飾而誦習之將以勸事君况其所自造之文乎然魯公沒且三百年未有祖述其書者其在舊史施之行事蓋僅有存焉而雜出傳記流於簡牘則百而一二銘載功業藏於山川則十而一二非好學不倦周流天下則不能徧知而盡見彼簡牘者有盡而山川者有壞不幸而不傳則又至於千萬而一二未可知也吳興沈侯哀魯公之忠而又嘉

其文懼久而有不傳與雖傳而不廣也於是採掇遺逸輯而編之詩賦銘記凡若干篇爲十五卷學者可觀焉蓋君子多見則守之以約沈侯好學喜聚書聚書至三萬卷若是多矣然猶常汲汲如不足者至其集魯公之文使必傳於天下必信於後世可謂守之以約而尚友者乎予是以序其意

漢魏以後贊頌聖賢者多矣語徃徃不倫或以宜存之爲言因併取各贊雜綴焉春秋緯有周公像贊云周公背僂是謂強僂成就周道輔于幼主庚信有伯禽贊云伯禽居魯鳴玉來朝周公政治爲國風謠北山有梓南山有橋禮容雖備俯仰無驕王粲有正考父贊云恂恂正父應德孔盛身爲國卿族則公姓年在耆耄三葉聞政維能不息申茲約敬饘粥予

口僂僂受命名書金鼎祚及後聖春秋緯有孔子像贊云孔子反字是謂尼邱德澤所與藏元通流湛方生孔子贊云文王旣沒微言將墜邈哉孔公龍見九九闡化繫象素王洙泗發揮中葉道映周季陸機孔子贊云孔子獻聖配天弘道風扇玄流思探神寶明發懷周興言謨老靈魂有行言觀蒼昊清歌先誠丹書有造摯虞孔子贊云仲尼大聖遭時昏荒河圖沈翳鳳鳥幽藏爰整禮樂以綜三綱因史立法是謂素王孫楚顏子贊云束身勵行宗事聖道鑽仰孜孜視予猶考戴逵顏子贊云天道天絕理非語象不有伊人誰隣誰仰際盡一時照無二朗契被元迹冥若影響夏侯湛閔子騫贊云聖旣擬天賢亦希聖蒸蒸子騫立體中正干祿辭親事親盡敬

勉心景迹擢辭流詠按周子賢希聖聖希天之言似本於此 嵇康原憲贊云原

憲味道財寡義豐栖遲華門安賤固窮絃歌自樂體逸心冲

進應子貢邈有清風夏侯湛左邱明贊云世亂讒勝君子道

憂邱明達聖致志春秋微言逃難旁行不流庶幾斯文希志

訓猷孫楚原壤贊云壤之軼張絕滅禮教寡交仲尼同機合

奧聖以之藏俗以之笑獨協區外孰知其妙左九嬪敬姜贊

云邈矣敬姜舍德之英於行則高於理斯明垂訓於宗厲發

奇聲宣尼三嘆萬代遺馨又梁元帝祭孔子文云粵若宗師

善如水至人若鏡祭顏子文云欽哉體一亞彼至人乍分介石時知落鱗不先稱實席上為珍致虛守靜曲巷安貧

欽風味道其德有隣

白居易哭孔戡詩云洛陽誰不死戡死聞長安我是知戡者直如弦從事得如此人人以為難人言明明代合置在

曲阜縣志卷一百

補遺

八

朝端或望居諫司有事戡必言或望居憲府有邪戡必彈

惜哉兩不諧沒齒為閒官竟不得一日嘗譽立君前形骸

隨衆人斂墓北邙山平生剛腸內直氣歸其間賢者為生

民生死懸在天謂天不愛人胡為生其賢謂天果愛民胡

為奪其年茫茫元化中誰執如此權屈大均夫子手植檜

詩生生仁壽意一檜每開屯氣得乾元大靈舍萬古春菓

知興廢早花應帝王真百尺屯壇畔摩澤鱗甲鍾靈氣遺

一樹歲久不生枝神聖有餘澤榮枯無盡時地鍾靈氣遺

天與太和私想像刪修日陰隨几杖移子貢手植楮詩仲

尼元氣在復此萬年枝一室心喪日三年手植時枝條相

向哭風雨至今悲再拜婆娑下何曾梁木萎栽培自端木

痛偏深手澤有如此扶疎知幾尋繞壁多異樹世世莫能
名一楮存梁柱孤標出魯城篋檀連翠色五味接芳英終
古思堂側依依復女貞

